





故兵部左侍郎吉水李公梅公今大司農之顯者也
司農文章政事重天下與予雅故曩予撫江右時加禮
其地之遺獻無日以怠時侍郎公墓本拱矣每愴想其
名德以不及見爲恨而數數從其鄉搜緝公遺文讀之
以自慰然未覩其全也今年春大司農郵寄公所爲詩
文曰石園集者眎予且屬以序夫然後盡得公之爲人
心益嚮往不能置公生平節槩及文章政事之卓卓可
傳者詳大司農行述中茲不具道第讀公集其詩若文
皆真機流露輸寫性情不假雕繪多自得之趣謝元暉
嘗云好詩圓美流轉如彈丸蘇子由亦云予作文要使
心如旋牀每句如珠圓蓋熟後所詣如此也韓昌黎言

文章之作恒發於羈旅草野至若王公貴人氣滿志得
非性能而好之則不暇以爲公詩若文大半皆宦成後
所作不第性能而好之又何多暇也蓋公配朱淑人亦
能文今集中所載倡和詩詞高情獨秀有林下風子惟
歐蘇皆名父之子其母又賢然不聞其能文也朱淑人
克相君子佑啓後人賢而多才實稱女士公優游暮齒
琴瑟靜好宜其所作工且多也而隋有李元操者少善
屬文晚年不復留意人問其故慨然歎曰五十之年倏
焉已過鬢垂素髮筋力已衰宦意文情一時都盡悲夫
公家居二十年以壽考終讀公晚年諸作宦意雖忘文
情益壯勝元操遠矣今大司農又克光公之遺緒文章

政事益大以遠嘗觀史策父子繼美者代不乏人要惟
公姓夥頤如德林百藥詞藻並雄道廣元紘贊皇父子
皆再世宰相作述重光而宋朝父子掌誥者九家文正
昉與子宗諤居其一焉唐代宗稱李揆曰卿門第人物
文章當世第一信朝廷羽儀故時人有頭頭第一之說
其公與大司農之謂夫昔蘇子瞻序范文正公集云公
文不待序而傳然不敢辭者自以八歲知敬愛公今四
十七年矣若獲挂名其文字中豈非疇昔之願也哉則
予今日幸序公集猶斯意也康熙壬午初夏商丘後學
宋犖撰

中樞解綬雖江淮相望而夢中識路魂爽相依辛卯余
與先生又膺 特召把晤長安先生仍佐樞而余復佐
銓每聽長樂鼓鐘接被聯鑣歡如旣翕風光片晌余抱
痛南奔先生亦遂尊鱸僑寓八寶今春泛櫂還文江風
雪旗亭傾醪道故廿年儲淚相對交揮先生一日出石
園詩集見示若曰是固焚燹劫餘存什一於千伯者子
其爲我序之余惟先生早造華實備歷清途深於君父
友朋之至情具有與觀羣怨之篤誼其所經緯結撰罔
不本諸肝膈動合神明先生未嘗秉規陳桀株株焉奉
一家言爲師承乃余流覽前後諸篇什冲澹則應物沈
雅類曲江悲壯合高岑清適如王孟與會標舉風緒橫

披造乎渾淪歸於極則僕本恨人狷癖寡調賴先生移
以霽月光風每覲德容潛消鄙吝今莊誦先生集彩徹
雲虹情芬蘭雪又不覺歷歷然杖履之周旋而壘篋之
共貫也序先生詩者海內自有名公宗匠何俟不肖而
文舉緩引風雅之穆如先絮生平之託契先生是必曰
余曩者識熊子於牽絲豈不能臆中懷於白首古今惟
知己之言樸而可諷鄭詩固美君子德音孔膠者而曰
風雨如晦雞鳴不已其在斯乎其在斯乎順治丙申暮
春新建熊文舉撰

近世之言詩何其夥也章甫縫掖之士挾策謁四方十
人而九詩搢紳先生排金閭曳紫闥之秦溯楚適越游

燕與夫皋壤遺賢憑今弔古一往情深又無不人人言
詩有詩必有序有序必張侈其詞擬陶而陶擬謝而謝
不曰方駕李杜即曰遠邁高岑荒唐無稽顛預自命偃
然附於作者之林不以過情爲恥於乎近世之言詩又
何其陋也夫詩者緣情而緯物應會而攄情有感於中
必著於外於是乎無聲而聲不韻而韻當其爲詩不自
知其爲詩也情觸焉物際焉口哦而音諧焉而詩出矣
猶之大塊噫氣不自知其怒號刁調也而羣籟鳴春氣
加物不自知其脈注甲坼也而百卉茂風水相遭不自
知其噌吰撞激也而金石宣花之妍也不自知其豔而
蘼逗於機鳥之吭也不自知其適而和寫於味知此然

後詩之大致可言知言詩之大致然後可以讀石園之
詩矣石園詩者少司馬李梅公先生之作與其朱夫人
唱和咸在焉先生蘊於道德之言澤於仁義之言其性
平易其貌充悅對人如光風霽月自處如璞玉渾金前
輩儀型於是乎在夫人肩鍾姬姑德協姒任詞賦史傳
博覽無遺琺瑯瓊璜造次中節與先生言無宴姬坐必
整襟一觴一詠如壘如篴此唱彼和徵絲比竹此其樂
可以遺榮可以偕老故其詩婉而多風和而善入所謂
自然而然非有使之然者也吾觀卿雲爛縵著於皇城
山川悠遠賡自王母二南言王化之端託始關雎鵲巢
故世之盛也其士君子有天保采薇穆如清風之頌而

其夫人里巷亦有螽斯芣苢雞鳴昧旦之謠及乎黍離興歌谷風致怨而家國汙隆政治得失較可觀矣誰謂詩者僅是搢紳縫掖牋注蟲魚吟弄月露之具而無關於香奩彤管邪故讀石園詩者必合之唱和而後知先生之寄託者微漸被者大也何也一門之內肅肅雖離和氣致祥於以宣志而鳴豫有不知其鏗鏘幼眇之所以然者此無聲而聲不韻而韻古人所以採詩觀風制禮作樂導性情之和而著節宣之效端必繇之是故詩者樂之句也樂者詩之聲也非至和不可以言樂非至樂不可以言詩先生之詩和始之樂終之盎然陶然于喁奧窅之中而可以自命千秋之外又何必拂鬱悽清

拍腸濯腎謬為形似之言故作不平之韻且屑屑比擬曰此陶謝此高岑此李杜也哉余與先生交最善唱和集久行於世而未能附一言茲以是集見屬復何敢辭竊為推本其夫指如此康熙壬寅仲春進賢朱傲撰海內能言之士無有不誦法梅公先生詩者以為其元氣渾然灑然是必能扶起積衰而接續於貞元之際矣余事先生歲月久所由服膺者深惟是泥水雲天為之離合乃比年更勤還往文律招尋籠中洩勃臭味繫之暱就如此猶未覩制作之大全豈先生有愛而不欲陳露乎抑謂是可聽之若存若亡而已乎茲幸得莊讀石園詩集凡八卷而目二十有一以三日夜卒業焉可謂

之梅檀片片皆香瓊樹枝枝是寶也夫登高作賦此直
卿大夫之本事而有能有不能苟為鄙野其才則躋攀
難上即使臺閣其體亦瓠落無容凡官位可以言詩而
不可以言詩也先生昔居清通簡要之司豈無如巨源
濬冲之製然業已自刪不俟延年因詠為去取矣惟夫
勝地瑰特光景流連良朋聚違言歡語感以至物狀之
所呈妍酒杯之所領略升沈之幻態見前歌哭之變聲
感耳久遊得其稅駕吉夢告以維何一一皆託之篇什
初乘於不得已而終藏於不可忘焉吉甫作頌穆如清
風則謝道韞既嘗好之而亦能似之房中唱和鐘鼓相
宣先生無亦猶是躬泳王化神遊風始而衆人謬以樂

事歸先生恐未可為通論也迹先生之生平何必無蒙
譏履險之一日而要聞其酸楚激發之詞或假借於
訶佛罵祖而為暢快即如以朔風零雨高視天下此豈
足留太和之宇宙乎后山嘗曰蘇詩學夢得故多怨刺
學不可不慎也而又謂其晚學在白失之麤以其得之
易若夫先生之於太白其殆早服之者哉敘悲賦恨固
不屑意而朶頤富貴捉鼻公卿其說無乃亦與寒乞作
對而實同根於先生何有矣先生於物無迕於學則無
不窺古今名家皆其採集之業詩筒見投亦期之點定
而反何其不遺下也易之咸曰君子以虛受人受人以
虛然後能感人以和平無俟勝其口說而言妙天下先

生所由行其元氣之渾然灑然於聲韻之內者凡以此也採詩無時廢而慮有時廢學士大夫如曩矇眊之職將不得修諂成亦與諷諭俱退而先生之言終可被諸管絃彌於朝野先儒之論三百篇者以爲詩有五際今得先生其亦幸無斷際已乎至若公夫人自在青藍之列公子實與玄白之文此皆世所驚以爲希奇而非余文情之所主也姑略及之南昌黎元寬拜手題

李梅公先生譽望在天下者已四五十年矣余少先生僅十歲以下無不同時之憾幸又生一郡余先世遷栗里先生近遷豫章亦不三百里而遙宜若久趨下風相與數晨夕欣奇文析疑義致足樂也顧余方北門小草

而先生已東山茂林先生方左樞崇牙而余適南邨小隱往往相失以致行年六十始獲登先生之門而請謁焉不啻僑肝如舊相識越一年乃得卒業先生石園詩凡二十種并得友其長公維介次公維饒益盡發其家藏而遠山夫人集并寓目焉以余數十年聞聲相思恥不出其門下迨老而始一遇不勝愉悞而且悲其不早從遊過壯夫不爲之時而聞孺子可教之語抑已晚矣然先生之高誼塵海灰池衣冠子姓淪沒捐金贖歸不啻顏魯公家先生之所爲余且身被之矣文江三李皆先達之斗極也御史大夫告余以學太宰語余以爲政佩之至今不敢忘先生不棄且引余以文章風雅之林

古人一登元禮之門而遂足以爲豪余不幾以登三傲之哉雖然誦先生之詩疑先生之志竊以爲贊皇之業炳烺於會昌者何難一日優爲而一詠三歎若深有慕乎區區下邑之陶淵明何況之下歟舍家之平泉不飲而思飲谷簾舍家之醒酒石不臥而思臥醉石舍家之南方草木不記而思記東籬毋亦厭梁肉而茹菖陽之誦歟然余於是而信先生之真也凡人之性情入而家人父子出而朋友交游以至山川雲物春秋興託鳥獸蟲魚琴瑟絲竹一草一木一觴一詠之微苟不有其真者存於其間是偃師之智也偃師之所造能倡者領其頤則歌合律捧其手則舞應節千變萬化非不惟意所

適然而皆假物也何以假中無性情焉耳先生之詩省靜和平冲澹淳雅高而不激近而不凌雜樂極而自然有節憂深而不傷非淵明之任真無所先其孰能幾之乎故人而無性情也者雖詞縟顏謝調綺蘇李而終不敢題爲詩之真也已然余又怪淵明翟夫人雖四隱名族尚發孺仲賢妻之歎生兒復不愛紙筆以天運付杯中則縱中有真意挾以自勝者幾何先生梅山偕隱倡和房中不止鴻案缺盥之敬而二妙温文才驚入洛石園高寄應不蕭條先生肯兄淵明而溟滓然弟之哉余才不可爲役石室宗祊文江密邇淵明故隴亦輟籃輿學其詩志其志猶筠箭之於松喬望之遠矣晚而獲事

先生知其輕得喪一生死一切不足以滑其性情之真者殆淵明之遺風也終願贊皇公文章著論褒然成一品之集浸白龍皮以宴門下客則余不佞或廢止酒之什於側焉足矣淵明曷足以方哉柴桑後學文德翼拜
撰

少司馬李梅公先生盛德大業彪寰區歲己亥拂衣歸江右卜築於灌城之南距徐孺子宅里許壘石成山雜植修篁垂柳嘉花異草芙蕖甘蕉栴檀之屬與其夫人遠山氏朝暮倡和其間顏之曰梅山小隱梅以自寓山以寓夫人字用託於鹿門偕隱之義曰小隱識謙也先生以名進士起家敷歷中外者三十餘年既已踐鷹

揚尚父之任老而明農故國世方屬望雷雨滄江以沛未竟之德而顧引龐公襄陽事以自況天下誰其許之而亦誰其信之余獨以爲不然昔之稱真隱者必務覈其中之所存而無徒徇於其迹迹是矣而或不免終南捷徑之疑又或不免處士盜虛聲之刺以較夫避世金馬門浮湛文石之陞而所存超然獨異者其得失爲何如哉然則先生雖踐鷹揚之任其與龐公所云鴻鵠巢於高林蛟龍穴於深淵者何以異夫亦覈其中之所存而已先生著作滿家而詩尤盛傳於世頃投余石園詩集計二十種自著凡十五種遠夫人倡和凡五種余得而竟讀之宏博藻麗清新俊逸沈著頓挫無不畢具而

菽以一言大抵不離所謂超然者近是當其掇高第陟
華廡翱翔審官之堂優游卿月之署日共賢士大夫投
壺雅歌銜杯刻燭作為清廟明堂饒歌橫吹諸篇何其
奇而壯也已而憫時悼俗憂讒畏譏辭閭闔以遠遊厭
承明而脫屣於是浮徐泗涉長淮徘徊三湘七澤間興
悲於鴻雁之賦隕涕於沔水之章抑何怫鬱而多懷也
未幾蓬萊清淺大厦摧頽巨室有中谷之嗟名族靡喬
木之倚曾日月幾何而江山不可復識相與混迹樵蘇
寄情圖史一委於吟詠嘯歌以消耗寒暑又何其磊落
而恬澹也蓋先生之遭逢屢變而詩亦因之屢變乃其
中之超然者歷終始而不渝隨所揮灑而皆不可掩假

令出而畀以統均榮以揆席吾知廊廟與山林無異視
鼎鉉與蓬茅無殊觀又安在不當以龐公相比擬哉自
古名公卿幸有其才而兼得文雅之偶為難幸有其偶
而垂老能堅偕隱之操為尤難先生之於遠夫人則王
司徒之有鍾琰徐洗馬之有劉令嫺也殆欲方駕古人
而駸駸過之然先生不以三公而易萬卷遠夫人不以
翟第翠蕤而易千秋則又鍾王與徐劉之所未逮也城
南片石從此而長價於天壤矣因漫為序以復洪崖山
樵陳弘緒拜手題

余曩與蕭大行論詩伯玉之持論甚嚴示以梅翁詩曰
此真詩也余曰然以風雅為己任者其在斯人乎近拈

向上一著不復喜看世人詩梅公不以耄而棄余授以二十年來之著述曰春浮草深一丈非老人誰定余詩者余笑而受之憩永慶恒公房焚香甲乙之雖乏天女送供而涼颺從竹間來覺齒舌似能放光歎曰詩不亡矣甚矣子輿夫子之善言詩也曰不知其人可乎是以論其世也是故余以論世而識梅翁之詩作者之詩也又因詩而識梅翁之人尚友千古之人也方今之爲公安景陵也而公曰否我自爲我之詩迨今之泛泛若水中之鳧也公曰否我自爲我昔日之詩耳力以我之厚救世之薄以我之重救世之佻人之言曰生斯世也爲斯詩也善斯可矣公則曰否在我者皆古之制也更可

異者隨草及唱和兩集則司馬夫人之著述颯颯乎大雅之遺乎二十年間經畏途歷九折處之如夷至於相與臧否人物揚扞今古商淩出處有淑媛之所不能及者亦奇矣人皆知我明之詩幾與唐垓余綜而定之潛溪淩星宿之源長河鼓元氣之鑰文水麾魯陽之戈功偉矣夫非佞也有知其解者始可與言詩也夫方原八十三叟薛正平撰

余嘗誦槎翁詩颯颯乎大雅之遺實與季迪對壘爲國初詩人冠臨川儼然後勁猶之時家言海內稱文潔義仍真豫章派矣淮南有言載哀者聞歌而泣載樂者見哭而笑得性情之真野狐涎自無可栖泊滄浪以禪喻

詩政以離意識處詩與禪一耳余每謂詩有真偽無工拙伯玉以爲然伯玉超然物外生平未嘗肯以語言爲世俗作緣山居諸作真伯玉之詩也他什亦稱是伯玉數爲余稱梅公詩汪汪千頃一晤對如抱秋月如坐春風宜其詩之恬以則在唐人真不減張曲江矣或曰無乃夏蟲之語冰建鼓騷壇所在而有何子之言寥寥哉若山陰竟陵何以位置之余笑曰棘猿玉葉不妨絕代之工近廣陵之姚子秀州之曹子皆至性人余未識曹子而知曹子之詩江左之風雅不在茲乎因舉似梅公以識吾黨之持論若此剩道人薛更生再題於秣陵旅舍

石園全集目錄

卷第一

星存草

詩二十八首

太華遊草

詩十四首

卷第二

南歸日涉

詩七十五首

卷第三

焚餘草

詩四十二首

楚遊草

詩三十五首

卷第四

出山賸語

詩十三首

心遠廬吟略

詩六首

潞遊草

詩四十一首

卷第五

詩四十二首

楚遊草

詩三十五首

卷第四

出山賸語

詩十三首

心遠廬吟略

詩六首

潞遊草

詩四十一首

卷第五

問津草

詩二十一首

歸夢寓鈔

詩三十三首

卷第六

偶遂草

詩三十六首

卷第七

鴻雪草

詩六十二首

卷第八

東湖隨筆上

詩四十三首

卷第九

東湖隨筆下

詩六十三首

卷第十

聽鶯草

詩六十二首

秋山紀遊

詩十八首

卷第十一

倡和初集上

詩四十七首

卷第十二

倡和初集下

詩四十四首

卷第十三

隨草上

詩五十三首

卷第十四

隨草下

詩七十九首

卷第十五

隨草詩餘

詩餘九十三首

卷第十六

鏡閣新聲

詩六十一首

卷第十七

隨草續編

詩五十八首

卷第十八

亦園嗣響

詩四十八首

卷第十九

遺詩一

詩四十二首

卷第二十

遺詩二

卷第二十一

遺詩三

卷第二十九

卷第二十二

遺詩四

卷第二十三

詩五十八首

灌研齋文藁一

序七首

卷第二十四

灌研齋文藁二

序九首

卷第二十五

灌研齋文藁三

序十首

卷第二十六

灌研齋文藁四

序十二首

卷第二十七

灌研齋文藁五

記七首

贊四首

題跋十四首

卷第二十八

灌研齋文藁六首

石園全集目錄
雜著二十一首

卷第二十九

灌研齋文藁七

祭文九首

卷第三十

灌研齋文藁八

行述一首

墓誌五首

石園全集目錄

石園全集卷第一

星存草

使臣多暇得以寄興於詩故涉歷修途永懷名勝且邂逅良友不少賡酬或得諸征軺或賦諸閒署皆曰星存志官也不忘逸我之深總荷湛恩之厚亦見當時道路無虞舟車安適知交無恙情好相披致足樂也往事隙駒來情結軫靜言思之輾轉予懷矣文江李元鼎

詩二十八首

雙城驛望諸祖道場

千年佛骨鎖琅函看到名山自不凡豈以風塵勞馬足故教煙樹護雲衫鐘聲遠渡湘江水寺影空憐碧玉巖

石園全集卷第一
一望禪關誰是祖只今惟見石頭巉

西河驛次鄉先輩毛東塘先生韻

客路寒山外郵亭野水中竹深斜過雨樹老曲搖風煙
島層層影雲嵐岸岸容可堪懷古意馬首正從龍

蘄水雨行

山行不雨亦生愁況復連朝雨未休雲湧斷橋迷去鳥
水飛曲澗急寒騶空林霧卷千峰暝古道煙深萬木稠
為問前途猶有幾小山盡處是黃州

小除前三日

客路依山遠鄉思入夢頻可堪將盡歲尚有未歸人物
候殊方共年華百感新天涯何所似驅馬向初春

廬山曉行喜晴

為報新晴有曉鐘朝來驅馬故從容何年雪在峰仍白
幾處霞生日未紅石隱斷橋殘雨沒寺連茅屋亂煙封
纔招五老如相語面面山光又不同

雙城道中

半逐春光信馬蹄王程遙指楚雲西殘梅逢驛猶堪折
弱柳來鶯漸欲啼山吐亂煙籠遠樹橋迎初日破寒溪
行行何處鐘聲迫極目靈山望轉迷

真州署中午寐

花發鶯啼細雨天可堪客路自年年閒亭欲憩愁難夢
瓜步潮聲到枕邊

雨過小塘次祁虎子年兄韻時中都久旱得雨
積雨侵官道郊原水亂分煙深迷古路樹遠薄重雲野
店朝光溼疎鐘斷岸聞田夫相慰勞齒頰帶餘醺

雨行

爲愛花時節蕭蕭風雨行邨臯雲擁樹山縣霧封城問
渡從橋折迂途識路傾鶯啼非選景到此欲無聲

江浦

政是春遊候星輶偶暫停惟餘三日暇未了六朝青微
雨分諸色輕煙亂一庭秦淮方爛熳獨向客途醒

太湖周年兄邀飲

蕭蕭夜雨暗孤城尊酒停鑣喜共傾萬里雲山桑梓誼

十年梁月弟兄情馬嘶芳草三春暮鶴唳閒庭一水清
客路不堪容易別垂楊是處有啼鶯

秋晚舟過清源飲餉部盧九台年兄園亭

雁斷帆飛外花殘客到時豈無三日語不罄數年思色
冷今行役名高古度支含情何以對解纜故遲遲

暇日數過銓部王年兄手談

每乘清暇共圍碁政是山公愛客時門撤棘防雙鶴下
案殘啓草一鶯知爲霑柳絮來詩料故揀榆錢佐酒資
盡日無人相對永當年簡要未如斯

曉山行

山頭一路疊谿筇春鎖重關冷碧紗巖岫參差通鳥徑

川原高下著人家野煙將露浮山曲宿雨留雲落澗斜
忽聽笛聲牛背起一天晴色散明霞

喬聖任年兄奉使爲鄒忠介師造葬兼承枉弔
賦別二首

清時文物重勞臣使節翩翩字水濱漢殿黃麻懸日月
夜臺碧草臥麒麟君因王事兼存友我拜私恩以及親
却憶廣陵三載別於今相見一回新
銜恤蕭然擁敝廬殷勤忽枉故人車愁深此日情難竭
夢入當年話有餘月落松聲來白馬風清節影漾紅蕖
平原空有經旬約不謂明朝又別余

都門送曠聲和璽卿南歸二首

怪是吾鄉客年來每易遷雲洲魚鳥亂藪石嘯歌便別
緒憐朝雨愁心寄暮蟬潞河清且駛行矣慎風煙
何必求其故如君能不歸部分南與北世以是爲非短
權通江晚長風刷羽微還家秋正爽恰好及鱸肥

秋夜雨吟

寂寂寒山寺誰然太乙藜不堪秋夜雨偏到小窓西

龍華寺雨後聞歌

颯颯秋風映遠汀殘編謾撫照流螢燈明古殿僧千偈
葉落空山雨一庭竹影不禁隨月去鐘聲且喜傷雲停
兀然坐惜良宵寂何處清歌入短亭

言官六人以忠直獲譴一朝賜環君明臣直

千載一時

一從鳴鳳出昭陽魂夢依稀繞建章忽荷九重新覆露
頓還六子舊班行山葵過雨心仍赤苑草迴風帶愈長
自是聖明超往古小臣拜手詠陶唐

送鶴林僧歸廬山

何處秋風至蕭蕭泛遠舫杖頭千點雨鉢底一函經湛
露朝分白疎林晚送青遙知歸去日瀑雪正泠泠

送閔星海山人之粵

去年君從羅浮來今日君向羅浮去羅浮洞天三百六
丹經玄籙探不足此日天風醉花草況值淋漓送春老
文江有酒堪相傾何事策杖向煙島苦死不作數日畱

君言粵州古靈州問津欲遇投瓜生渡海要尋煮石叟
囊中貯得真山水好護龍筇過嶺頭

節母詩

章江之流清且潔寶髻當年共水冽聲悲絲絡咽寒雲
淚溼窗花照紅雪羅幌月明桂影空玉庭霜冷芝蘭擷
擷得芝蘭盡日芬鳳羽遙向金門刷白下久高單父琴
九華新擁神君轍爲述先公志尚存微得綸恩耀苦節
臣無祖母無今日一字陳情一字血

贈羅虛白四首

并序

余熒焉廬居年餘矣深秋露寒草木黃落每念先君
子容光未嘗不恍然心目而傳神爲缺此恨千古偶

虛白羅君過訪悲喜交集深憾當日君從吳門來欲
貌先容未及也猶幸曾一晤對或存其似余拜焉虛
白唯唯齋肅三晝宵下筆疾寫形神如生虛白言若
有神告之不自知其至此哀感之餘不能成聲爰書
數語識之虛白清韻朗神久著名下此特其寄焉耳
有子宏才將大家聲昔李成畫山水岸脚饒平遠闊
厚之致人以下其後之必昌故未及之

正值悲搖落深林掩蔽廬忽然經筆墨頓爾異與居落
落含毫際悠悠寫照餘我親原不朽儼矣更愁余
每於曾歷處一見輒銷魂以子神能寫皆余念所捫豈
云談笑具却使性情存荼茹緣何事空齋濺淚痕

記得趨庭日吳門君返時爲言申後約詎敢失前期感
昔高情在憐今落墨奇就令當境寫只可肖如斯
聞客姑蘇市賢豪屐齒芬攜將吳練馬貌取震湖雲歷
落風塵氣蕭疎鶴鷺羣報君惟令子曰美秀而文

太華遊草

秦中太華在五岳最奇吾鄉樂安有山亦曰太華祀葛
稚川稱赫余於己未遊此有詩十餘首遂爲一帙昔越
東王性海借使車得遊名岳姑蘇朱白民山人一瓢一
衲七年之間幾徧域內山川江陰徐霞客又復過之直
躋崑崙考河源而返總皆時平意適克肆其遊歷如此
今興懷寥落咫尺之間猶且舟車莫達而况遼遠如西

石園全集卷第一
華者乎另紀此遊以別於西華可也

詩十四首

曉發

曉起趣層巔荒山斷且連奇懷隨馬首殘夢託輿肩護
茗僧樵壑滋畚鳥獵煙道逢來往者大半說遊仙

望華蓋山

忽驚異色照人顏一望層巒指顧間似以真形方五岳
肯將奇影讓三山登高準欲尋煙屐采勝尤宜借羽鬣
最愛斜陽催路晚溪橋的的近玄關

華山同友人宿陳鍊士舍

不將清話付黃梁道院沈沈挹露涼有意餐霞尋羽客

何來臥月共仙郎巖頭雪積鸞吹細洞口雲深鶴夢長
自是去天真尺五高峰隱隱逗爐香

崇仙觀贈陳寄蓮羽客

小島聊云寄崖蓮幾度開荒臺餘晉履斷碣付秦灰顏
公碑燬於火故有此句洞老玄猿嘯峰高白雁回石橋能渡否吾意在

天台

香爐峰

攜得仙人白玉節夜深無語對青松曉來霧起千山冥
獨出香爐第一峰

羽客索書

爲寫黃庭換白鵝顏碑玉賦不爭多春來好種桃千樹

攜去高山譜爛柯

謁華二首

奇峰高峙擁玄君
瞥見瓊田倩鶴耘
爲報麒麟來上界
特隨劔佩到重雲
卷崖香霧蒙茸出
隔嶺碁聲約略聞
一嘯翛然風御冷
瑤花芝草自紛紛

怪來飛鷲蹋層巔
恐有人傳紫洞仙
幻結樓臺通九子
平臨島嶼列三天
猿知敲石閒窺易
鳥解磨嵐學草玄
丹竈依稀雲去遠
碧簫早已裊晴煙

著碁峰

不愁石爛水流來
親到碁峰嶺上回
恰與仙人終一局
袖中贏得小蓬萊

大華山頂三首

千盤齒齒鬱岧嶢
果有丹梯上碧霄
羽客猶嫌峰未峻
環巒依險疊雲寮

眼底山山總浪紋
老龍潭起沫斜曛
須臾霧卷孤峰出
散作高天幾段雲

蹋破蒼茫過紫玄
洞天碧冷一壇煙
偶尋太古藏書處
知祕靈文字五千

華山夜歸宿恩江贈朱月航明府

幾日餐煙更枕霞
夢回猶自說仙家
忽歸明月河陽柳
還記石崖碧洞花
郊外鐘聲來野寺
橋頭帘影帶晴霞
知君飛舄尋常事
贏得清光滿道斜

邨店老翁歌

曾去華山不百里青邨黃葉桃源裏攜得玄關一片雲
散入荒郊翠且紫燈下忽見一老翁白髮蒙茸不知紀
長揖蕭然向我前自言曾見家御史御史聞道今清卿
高風遠韻常懷止更聞君家皆慕仙仙家風景果何似
嗒然一笑姑妄言仙人舍下原同譜不見盤根今古傳
唐有白兮周有耳老翁顧我亦欣然果聞浮丘亦姓李
呼童滿酌邨釀新一尊明月徑醉矣醉中把書一覺眠
茅店雞聲喚人起披衣起視山頭霜門外長嘶叫駉駉

石園全集卷第一

石園全集卷第二

南歸日涉

舟泊石城時秋暑正毒累徙不如意得梅公近詩讀之
覺清風之襲余懷冷然善也梅公自燕臺抵白門逢佳
山水美節物輒徘徊詠意不能自己良宴悵友率爾
歡暢興會所至篇什益多梅公原有別才又託寄道上
雖一往奔放而玄微自合正如支公注逍遙能拔理於
向郭之外又如摩詰之畫天機獨出非復以工力學問
爲長者善兵者行千里而不勞行於無入之地也余年
來最厭近人詩古法蕩盡率苟於所利取悅近日間有
小致亦鄰方回家奴耳故每一捉筆輒思與古人敵其

出入一謹於良法寧損有餘之才而必不爲世俗之心
所誘奪然歲所得詩不能十餘首蓋持法嚴而士寡樂
用之氣也故世有梅公天下賀戰勝者必歸之苟未能
然則安吾之拙猶可以不敗夫天下才如梅公者幾人
哉同年弟蕭士瑋題於秦淮之略園

往歲薄遊西昌晨夕吾友伯玉每論次西土賢豪長者
必曰梅公梅公西昌令禦寇有功不能白輒思梅公伯
玉詩文成踟躕欲有所定亦輒思梅公伯玉以高才淹
下僚稍遷南光祿簿與余泛彭蠡涉大江而南客秦淮
一日來驚相告也曰至矣梅公舟今次城下則見余梅
公舟中出船巍然使人神聳已坐語金和玉節又温温

恭人也蓋至是余始識梅公云梅公官銓曹檢鏡流品
扶進善類勤勤奉公顧有時澄懷清讌則詠歌自娛一
不以塵務經心日者請假南還得詩百有餘篇皆情來
景會假塗筆墨稱性解懸之作也詩之爲道本情寄道
無取瑀模今世名能詩者矜蟲問鶴圖繒翦錦已耳求
其直寫厥衷英蕤秀隱不由補假者蓋十不得一且百
不得一矣梅公出都門而懷君過舊游而憶父風塵孔
道而求友聲乃至胥江怒濤而哀奚童要皆發乎至性
無忝風人優柔忠厚之旨其於賦形體物則難狀之景
畫之目前百變之態籠之句內風力丹彩忽然而來渾
然而就神與境會作者亦不自知其所繇然也昔人云

臣心如水至其胷中一片冰壺又與玄對山水寤言方
外見之意得之向往清沁人脾峻奪人魄蓋自北而
南抵西湖道桐江諸所流覽感觸一一紀之以詩方之
少陵詩史雅相當矣伯玉讀而灑然異之爲詮次而手
授余及子將云二子者是宜知詩蓋相與共評之傳之
通邑大都使知風流不墜詩固未亡於吾江以西彼若
愚魯直猶未足爲梅公道也刻成而余爲題其後至余
與梅公同遊累日夕登山臨水賞文析義之樂悉見是
編不具論第論其所爲詩者禹航嚴調御題於溪上之
古秋堂

往讀李梅公先生制舉義爲慨然久之曰此弘正之遺
也辛卯夏復見先生翰墨於其兄紫函使君所姿神奕
奕輒歎鍾王再生今年夏秋間先生同嚴子印持自白
下來蕭子伯玉貽余書曰李梅公今之供奉玉局也子
毋以貴人遺之余爲神往屬有采薪之憂未遑遽見嚴
子先示余南歸諸詩讀之則青蓮之逸少陵之渾蘇州
之澹王孟之自然與夫香山之達放翁之放無所不有
已而顧余龍泓草堂相視莫逆復授余以詩則宛然一
山居圖也昔人稱山路元無雨空翠濕人衣之句爲詩
中有畫如先生者真足以當之矣從是數晤先生於十
八澗於湖舫將別又復永夜劇談於清平山居每會輒
披心膽相向殷殷氣誼無異數十年貧交余因歎天下

有勢分無情交久矣今乃不意得之先生蕭子之言豈欺我哉豈欺我哉南歸草成屬序於余余特表先生之為人卓然當於古人中求之區區徒以詩文翰墨誦先生者皆淺之乎知先生也武林社走聞啓祥小築山居題

顏延年與謝康樂皆為江左第一靈運俊發延年深密遂稱顏謝延年問鮑參軍已與謝詩鮑云君詩若鋪錦列繡雕績滿眼謝如初日芙蓉自然可愛似此固當稱謝顏二人各有長處不相下也夫詩有別才會心不遠天然之趣又非攻苦所可至如相馬者牝牡驪黃之外自見神駿若按圖索駿欲空凡馬難矣九方歎所以相

其天耳夫詩亦若是余嘗與梅公論詩及此為之首肯梅公弱冠為詩夙具天才又名士早達仕宦清華未嘗以牢騷抑塞損其氣米鹽細碎傷其致其為詩之工宜也梅公曾懷瀟灑如雪如雲交異人讀異書沖然自下不以富貴減韻在銓曹時清通簡要啓事之餘不廢詠歌比請假恣情山水著作滿帙如靈運得意之篇手自書之時稱二寶海內詩人評梓以傳紙為之貴王孟風格悠然澹遠蕭伯玉序之更以屬余余謂梅公不為搢紳之詩而為詞人之詩此其所以傳也時余流寓寄嚴印持刻之石城浮沈偶逸其橐甲戌以來梅公才名致忌高臥通德門者八年胸懷瀟灑不異平日門庭牆壁

無非圖史揣摩當世之務報 上知遇涉江漢遊赤壁
登黃鶴樓暢其志意爲詩益工仙仙乎有青蓮妙境遷
客之懷廓然無有客以爲言余答云往年讀書晉陵與
孫文介看長公小品先生云蘇公多此消遣法余曰未
然愛君憂國固端明本懷然非胸襟瀟灑則與急功名
者何異志完流涕相對雖是忠愛亦復不韻先生鼓掌
曰孝則他日非復科名中人也梅公余同里兒女姻婭
未嘗旬日不把臂兩人心期不作第二義若夫急功名
隳志節梅公恥之余亦恥之吾鄉所少者非公卿所重
者亦非公卿出處無慙隱顯同心予與梅公平生久要
固有所在詩固其一端耳同盟社弟劉同升撰

此余銓司給假南還詩也自燕臺道出中州渡江抵金
陵迤邐吳越而歸於時蕭伯玉劉晉卿聚晤金陵嚴印
持聞子將握手明聖湖邊恨相見晚共爲余刪定斯編
授梓回思友朋山水之樂爲生平所僅有者今諸君子
皆已下世而茲冊亦僅存於劫火灰燼之餘詩何足云
特以印友之序言在焉故不忍付之一擲耳俯仰今昔
爲之永歎李元鼎

詩七十五首

雨後出都同舍攜酒見過賦別

三載爲郎共飲冰驅車耐可及炎蒸 主恩鄭重憐荒

草

時以歸
葬請假

友誼殷勤骨古藤

署中有
藤甚古

客路明朝愁宿雨離情

此夜照深燈分攜為念從今遠酒歇茶香話未曾

涿州

春明北望是徐無簡點閒愁付客車一自華陽風雨後
至今猶問灞橋驢

雨過上谷有感二首

先君子曾官其地

宦況當年易水寒蟬聲滿路促歸鞍不堪古道連雲斷
豈謂垂楊帶雨殘客舍何因悲夜鐸官衙依舊鎖晴巒
惟餘故老來相問話到傷心淚忍乾

三年兩過傷魂處夏涉滹沱念亦寒故老爭傳君有子
藐孤敢謂我能官最憐驅馬年將壯記得趨庭髮未髡
欲問甘棠知有在古蓮池草為誰丹

上谷有古蓮池

行次新樂閱邸報見鄭方水先生宣麻王浣觀

吳朗公兩年丈釋繫喜而賦此

行行回首望長安驅馬渾忘客路難爭說卜甌傳主
聖更聞解網識恩寬平沙擁樹濃陰合野店通橋落照
殘往事不堪頻記憶今時趁取一彈冠

曉發望田家

曉發澹朝暉炊煙繞樹微風和牛犢憩雨足稻梁肥瓦
甕餘香釀茅檐續夜機更憐邨婦豔花插滿頭歸

沙河公署次辟間韻

古署暮棲鴉前邨酒漫賒漏聲催柝急林影入亭斜歸
夢隨殘雨征途問遠沙為憐今夜月暫爾一停車

邯鄲道中

驅車向路岐日光正杲杲遠樹團輕煙晴雲堆不埽忽
聞輿人言行行邯鄲道下馬拜荒祠所思在蓬島夢覺
竟何分領略難草草野氣含岫曲磎影入林倒聞說邯
鄲女織織殊靜好又聞古狹斜紫駟絡金寶我來胡不
見惆悵令人懊荆山高矗矗溢水流灑灑新夢長高原
戰場拾遺笥牛羊散平疇劔戟列城堡豈不念時危耿
耿余懷抱寄言枕上人今我還山早

古別離

朝見燕雀飛暮聞蟋蟀語淚落染衣裳吳綃不如紙遠
山隔重秋流澌古渡頭豈曰無舟楫風波不勝愁遠山

流澌愁不歇煙樹蒙茸想蹄蹶夜長人靜夢初成寒雲
吹徹關山月

雨經湯陰謁岳廟

喋血當年一手扶弓彫猶許伴殘鐸長虹有恨連雲暝
老鶴無情帶雨呼北谷疎鐘殘古廟西冷荒草暗平蕪
只今塞上仍烽火鐵騎聲銷夜月孤

鄴城懷古

千載風流鄴下才湯湯洹水抱城隈鐵梁樹裊朝曦落
冰井莓生夜雨來斷甬有時傳九錫荒陵依舊繞三臺
當年幽憤情何極古路蟬聲夏木哀

假歸過大梁旅寓郊外樊鍾陽中丞同家侍御

載酒過訪夜談及曉乃別即席賦謝
相將騎隊出夷門夜月天涯酒一尊
話舊仍餘青眼在憂時但遣赤心存
竹林我愛雲山好河朔人傳笑語溫
坐久東方知既白雙雙旌節曙雲屯

杞縣黎伯雍令君招飲孟園次喻大僕辟間韻

黎為秦
中同鄉

何必名園話辟疆溪聲柳浪沸虛堂
孤城臥月深藏暑野艇移虹曲引涼
共是函關聯紫氣豈從勾漏問玄霜
白歸不惜為君醉滿路荷花浥令香

朝發

澹月餘林氣殘星落曉鞭但因羣動出
愈見衆情全野

鶯衝煙直閒荷瀉露圓偶聞鐘磬發
輸却老僧眠

睢陽雨夜次辟間韻

郡有張睢陽祠
時遲友不至

雨暗郵亭急暮陰檐頭歷亂總關心
遲人空有潼山約懷古惟餘睢水深
氣撼孤城憐日落祠環荒樹與雲沈
八公草木今何在宴客猶聞話紫金

固鎮道中

到來一望是平原草色青青帶雨痕
明滅亂山迷極浦斷連茅屋結荒邨
危橋支木輿蹄怯野艇橫河古渡渾
但說桑麻今歲好田家餉耨總君恩

暑望

火雲炙日暑旗揭驅馬何堪值六月
風生滿路不成涼

行者息者共一鞭馬毛煮盡垂垂低鳥語澀來聲聲渴
輿人一步一喘流空言古道直如髮況當宿雨漲新河
斷岸千尺增心悖野外疇平一望圓看看茅店如蔭樾
桑麻翻浪芊芊長牛犢酣眠青草斲田家力作苦相勞
揮汗如雨面成鐵大婦持耒向郊原小婦相杵問年來
惟有老夫閒看人抱甕井頭待行渴

盤山風雨驟至三首

亂山鬱嶢嶢策馬火雲爍磴曲紆疑斷峰迴近亦遙雲
深能結雨風急若乘潮賸有明朝幸前途暑氣消
石髮雲衣疊浪裁高岡立馬共徘徊老僧煮茗來迎客
笑指前山雨欲來

高下參差不記重茅菴煙斷樹雲封馬蹄步步猶相見
已隔層巒第幾峰

瑯琊夜遊次蘇長公韻

馬上帶來關山雨逢山即問瑯琊路輿人指點向幽巒
蒼龍穩眠黃鸝語山自青青水綠綠遊情正逐谷鳥飛
有客攜尊共招集泉香酒冽溪魚肥盤回突兀非一相
捫蘿屢坐山亭上煙花竹樹總不猶環滁奇景堪指掌
山如好女不輕售不是醉翁不與久醉翁四十即稱翁
行歌梅花招野叟我方翻倦春明出自顧是六還是一
醉歸頓覺暑氣涼燈火水天自色色

柏子潭

琅邪景無窮而
余僅歷其四

柏香飄拂御煙青

有御製碑文

石碣凌霄護此亭潭下老龍呼

不起年年雨氣帶殘腥

水天自色色

幽谷

當年竹樹傍巖栽古字蒼茫半草萊聞說山頭風雨夜
龍吟猶自護荒苔

渡江大風

久倦輪蹄喜浪紋扁舟不憚犯江氛怪來沫吼魚龍立
坐去濤驚鷺屋分葦岸遠翻桃葉水石帆空撼秣陵雲
停橈謾說公無渡是處風波帶雨聞

江頭阻渡夜泊有懷劉晉卿社兄及家兄紫函

江上月明好狂飈未可驚孤帆依岸斷野渡與舟橫所

念惟昆弟於情繫友生不堪良夜隔一水正盈盈

中河曉泛

曉渡入河陰帆檣半隱林人家依水曲漁舫棹花深草
樹皆藏畫溪山總助吟豈須懷勝賞是處可幽尋

舟泊石頭曉望

輕掠朝煙蕩曉空卷簾猶愛影玲瓏餘香隔舫纔迴月
賸雨露林欲洗風水步每疑閒樹踐岸文不耐信潮籠
石頭城下舸還繫橋外初傳野寺鐘

將發白門蕭伯玉年兄以詩見留依韻答之二

首

寧肯輕言去舟還倚石睡眠餐看色色煙雨付枝枝暇

即成歸想遊多是飲時况聞梧葉下解纜可宜遲
每思成獨往隨意傍江陲豈趁留人月猶辭送客枝白
仍三島外青是六朝時此日方還棹因君乃故遲

石城解纜與嚴印持社兄不期聯舟遂訂湖上
之約二首

豈無攜手願未想便聯舟暑怯通林氣江平澹客愁但
同連夕語不負浹旬留吳越余曾歷今來乃勝遊
與子舟同發沿洄總自如况乘新月上又值早涼初筆
墨還山水尊壘共鳥魚西冷猶有約耐可緩歸與

初秋南下同印持及家兄紫函遊燕子磯即與
兄別欲登弘濟寺不果

雲根並樹矗江隈水岸橫吞勢欲摧山氣遠從鍾阜盡
石顏似向海門開澄流靜月來漁舫野寺疎煙隔梵臺
最是登臨兼握別一聲孤雁落秋杯

潤州晚泊不及登金山呼舟作北固遊時新月
初上風雨欲來

急呼小艇泛溪花纔辨峰頭識米家古殿參差依岫曲
長廊委宛入林斜山山樹樹微懸月雨雨風風漸隱霞
更上石亭天際望金焦落處是星槎

七月六日舟發燕磯風道水駛午後遂檣潤州
亦悞事也同印持遊甘露寺歸舟雨過夜起涼
甚忽憶家紫函走筆作別兄行兼懷晉卿

下馬渡江來，浹旬留白下。夫豈不懷歸，遲遲胡爲者。別
兄七年未見兄，相聚難得石頭城。有酒於今能不醉，金
谷何須詩必成。倒酒論詩無賸義，炎歎早向河亭避。樓
船簫鼓雜還來，中有蛾眉亦鮮致。怪來置我聲歌叢，擬
挂秋風入越中。欲行不行爲兄語，一朝發櫂下江東。解
纜河橋正執手，爲立斯須恨難久。更乘畫舫及余舟，尊
壘楚楚羅昆友。知余夢想燕磯遊，同遊又可半晌留。兩
岸蘆洲起行色，觀音門外看江流。長江靜夜平如練，新
月更從遠山見。船頭一揖各含情，山色水聲相戀餞。曉
來中流一葉懸，鍾山宛轉亦足憐。繫帆破浪洪濤急，亭
午已過中泠泉。金山欲往愁日暮，乘興攜筇上北固。步

月復拜蘇米石石上鬚眉森可數，斯遊猶似與兄俱。推
窗不覺暑難驅，忽驚風雨成獨寐。汀雁淒切聲聲孤，載
得秋聲去吳越。秋風秋葉更秋月，有約尚憩西子湖。江
邊鱸魚山上蕨，弟住西湖傍。兄仍居帝鄉，會當新露濃。
欲聞清桂香，露華桂子倘堪慰。但說別離亦無謂，爲問
劉郎洞口來。秋來還有桃花未。

出詩似印持，求爲點定得其來句屬和。

未欲輒論詩，相逢趁此時。從來存意氣，寧復藉言詞。刪
落煩良友，收藏與侍兒。千秋玄晏事，斯語豈余欺。

惠山雨中觀鄒園歸舟爲文文起陳明卿兩太
史話及有感

幸不秋歸在客先蒙茸草樹各依然看雲終愛愚公谷
黃茗初嘗陸子泉為助澗聲宜急雨卻添山色屬流煙
名園自昔歌吹地門掩孤花冷暮蟬

錫山舟中即事

別無山與共一派黛煙浮塏影孤搖曙溪容媚引秋風
來舳艫亂雲度桔槔愁會欲尋幽去斟泉俯碧流

虎丘二首

纔望空林即舍舟石平如削與雲流澗飛絕壑懸千籟
池冷危岡護一丘古寺堂深憐浩劫寺燬於火閒亭樹老歷沈
浮只今為問談經處草鞠荒臺但碧秋
寺滿松杉片石孤橋橫澗影落浮屠池光映壑立宮靜

闔閭墓

劔氣沈雲霸業徂

試劔石

幽梵夜分傳宋偈

宋文帝聽生公說法

清歌

秋半想吳歛

聞中秋歌者畢集

登臨不少遊人蹟獨愛深山說白

蘇

五賢祠有二公

平遠閣野眺

傑閣涵虛瞰野坳澹雲薄霧溼秋汀舟浮遠水遙分白
霜入疎林漸謝青曲徑香消迷響屨懸崖瀑散落支硯
山遊亦有餘華意翠壁丹楓總畫屏

登虎丘寺塏絕頂

憑虛步步躡層霄水國菰沈暗野藻茂苑煙波籠遠市
吳宮花草鎖寒潮森疎竹樹看明滅隱見湖山隔近遙
忽望秋風天際起碧空咫尺度清簫

野泊即事

澤國分流出孤帆落日涵菱波浮釣艇桑影覆僧菴途
遠頻呼九浙俗問途皆以九對月明可醉三時與印持對酌蓮歌何處發曲曲
是江南

鶯脰湖看月便登湖心菴

為愛湖光遠乘風泛野艫山當來越嶠水欲盡吳江波
影初浮月梵聲晚透窗中流能一柱小結亦蓮邦

同蔡韞先館卿錢孺愿同舍遊南屏山

一權放中流雲山遠近秋呼林尋鶴帙問寺倩僧郵古
僻巖間路清波郭外洲漸看叢桂發紅葉不知愁

舟泛

野色凝空泛波光隱夕陽荷殘橫遠練蓼密護寒蟿燈
火家家市亭臺岸岸莊相攜閒散步山水共微茫

蘇隄閒步

返照下層霄秋聲第幾橋霜來還怯曙月上欲遲潮雁
羽晴沈字漁歌晚度簫忽聞清嘯發隔舫動柔橈

吳山曠然樓

一山孤峙俯城低極目空濛赴景齊浪疊明湖疎斷雁
潮生碧海倒晴蜺雲飛在在疑藏笈石徑層層好杖藜
約略尋幽能幾處蒼煙已綴夕陽西

三茅觀

古院隔層峰循崖共策筇危鈴吹老殿懸火洞深松賸

欲傳笙鶴猶憐話鼎鐘

漢鼎唐鐘為俗吏所毀

雲深知有處高閣隱三

丰

紫陽菴

窮劣藏深險空明嵌洞遙
紫雲封石骨翠粉落巖腰
猿老時窺壁鶴歸幾度橋
坡公亭畔路一半鎖禪寮

雲居寺

欲盡探奇約還同問了元
井光寒聖水地老失松軒
急雨添潮色新泥印屐痕
遊情仍未已覓權入花源

雨後舟遊

有意成幽泛扁舟趁雨餘
煙封千樹晚山隱一湖虛
物靜魚潛舸光深鳥避廬
醉來閒望處明滅見芙蕖

過聞子將社兄龍泓山居三首

一派空濛色溪流盡日聞
途紆防問字閣迴為遲雲
花氣沈幽羽茶煙映夕曛
坐來疑有異水木甚私君

辨公歸息地玉局再來人
高下皆宜屋孤清不結鄰
酌泉開遠梵燒筍出空燐
但覺秋光迫泠泠總淨因

大都丘壑具學古類安禪
樹密雲篩竹山空鳥浴煙
雄文終起草幽韻付司箋

子將有歌童韻甚

還問閒堂舊風聲落紫

錢

訪靈源僧於法相寺

林翳途能曲舟停酒共移
窺雲循澗遠問寺得鐘遲
鉢老青蒲臥衣寒翠葉知
為攜幽興返燒燭讀新詩

次陳眉公韻爲聞子將太翁
亂落松花點鬢霜但餘閒日照人忙氣關魚鳥情能狎
政在觴歌興自狂鷺嶺月分藜杖火龍泓泉煮竹爐湯
米船謝屐年年度並作先生選佛場

題秋江圖

淺淡雲山乍有無酒帘高卷布帆孤閒來權入蘆花岸
月落寒潭一雁呼

讀印持長公子岸苓社文波瀾獨老問年三十
耳余來湖上適其初度詩以贈之

曾未一見君見君苓社草走筆餘異光冥心發幽藻驚
人意老宿圖畫久探討及乎睹丰儀長大兼美好意氣

見眉宇湖山共浩渺譚言每參微文酒恣傾倒云胡有
未懌悒悒此懷抱豈謂千秋業盛年苦不早余閱人多
矣如君世應少豈長貴丘園寧爲謀梁稻雲霄咫尺間
功名何足道勉旃崇明德三十未云老

同印持子將子岸昆季十八澗訪佛日禪師四
首

曲折南峰束迴環古澗流但疑來梵磬尚似隔林丘葉
響秋聲迫嵐明雨氣浮行行豺虎迹彌望欲成愁
漸入無人地孤光蔽野嶂尋流依鳥渡取境共猿登老
寺新危閣懸巖隱定僧叩關纔一到彷彿記來曾
一榻坐袈裟棲遲度歲華誅茅恢古殿卓錫引流霞短

髮梳雲白長吟掠照斜
虎溪曾過否
槭槭響巖花
已覺幽閒甚
還言有靜棲
捫蘿窺閣遠
支竹俯雲低
林缺江流見
山空木影齊
寥寥人外世
但恐再來遲
舟發武林印
持送余嚴灘
適余有奚奴
之慟援
筆作此以志
離緒并寄示
子將

別被西湖頭以爲徑別矣
云胡載扁舟
溯灘來七里
豈無朋友好
誰復能爾爾
憶昔發白門
聯帆共居起
酒氣蒸雲霞
筆花落素紙
有山便同登
得句互驚喜
一自入武林
晨昏醉羅綺
其得偕幽探
曾不數日耳
忽忽且言還
欲去更迤邐
幸得同心人
攬擷江山裏
河伯何不仁
奄忽奪余美
中懷慘不歡
物化悲朝萎
相慰感子詩
愁

結固難已我輩重別離
何況隔生死
前路是嚴州
子陵君家氏
握手少斯須
須聚散
珍寸晷
看子歸舟去
江聲潔且駛
我行政上游
石頭且齒齒
對子難爲懷
子別更何似
此中隱莫宣
歸爲語聞子
聞子倘同情
共問錢塘水

瀧中八首

片石俯空江
竹日斜虛閣
潭下魚深避
猶恐垂綸落
峰翠翳流雲
嵐光照綠玉
湍聲急欲摧
兩岸尚相蹙
物情靜乃幽
山鳥自相語
但見舟去來
不見水來去
竹樹無真色
行行幾回換
冥濛若無日
日到青山斷
茲山云七里
七里若羊腸
灣流咽曲岫
愁殺黃頭郎
宿霧猶未收
水明深見底
不知有人家
炊煙四林起

萬象煩應接入夜共一清峽東天爲小飛沫溼餘星
我亦有桐江釣竿時可把趁此秋風歸悠然籬菊下

過石洪

怪石磷磷立輕帆片片柔急湍迴淺瀨斷磧枕橫流人
力聲中盡鄉心望處悠艱難纔一濟又復報膠舟

蘭亭對酒

行來漸似客懷清滿路江山遞送迎細雨溼林疑浣菊
晚風吹露欲香橙沙明野水分秋色葉落疎鐘入夜情
三徑雖荒歸未遠開尊聊復醉砧聲

南屏竹閣韻舟次南浦書寄必慧上人

空山一片雲高閣倚深竹蕭疎映湖光泠泠秋意肅中

流畫舫閒古寺梵磬穆酌酒蒸明霞論詩薄晴旭忽有
高僧來儼然古天竺叩之亦何言炯炯雙眸矚異響出
林端剝啄想樵牧悠悠水石間萬象多所蓄澗外聞溪
聲依微濯寒菊

石園全集卷第二

石園全集卷第三

焚餘集

余舊詩不止此也兵火之餘焚燬殆盡總不復記憶矣
壬辰夏長兒祺自家來揚因出此詩蓋從千百燬劫之
後與余家四世誥命及余鄉會全場墨並存者夫以數
世藏書一朝化爲冷灰而餘茲嚶嚶蟲吟亦將何哉余
欲棄去兒請曰此固大人嘔心之餘止存什一於千百
兒珍祕十年而始獲全即不以行世而存之於家以示
子孫亦無不可余乃痛加刪削以其存者名曰焚餘

詩四十二首

夏夜春浮園坐月次蕭伯玉年兄韻

何地能無月而偏此際佳豈緣雲所適況在水之涯野
色欣靡託孤光澹不俳坐深忘夜永幽意若爲諧

過蕭次公陶菴

蕭疎支徑竹能修梵榻依然傍古樓山水不須煩位置
林園固自足清幽層層設色疑畱畫曲曲含煙好泛舟
極目陰森天際遠一隄遙隔是春浮

宿蕭季公梅檀林

分取春浮一曲餘胷中丘壑總如如廊陰晚接花前檻
閣影深搖竹外居雨過煙沈迷擢遠月來樹隔得鐘疎
西莊曾復招裴迪我欲相從更結廬

夏夜訪蕭伯玉於春浮園別去惘然書此志懷

入夏擷芳蘭采采不盈掬駕言出西郭豈不畏炎溽念
我平生友楚然寄空谷下馬一扣門午睡旣初足雖已
憇招提還過訪林麓泛彼陶菴舟載遵梅檀陸曠因水
所爲靜乃山之蓄樹密地無容石疎雲寡族新枝匪一
香老蚪跼且蠹隨意著亭臺窈窕眩流目疑是山陰道
亦曰武夷曲主人不謂然吾自適吾獨肯不數日畱中
懷愜其夙散髮臥長林披襟倚寒玉行或出木末擢或
刺巖腹醉酒移高陰雄談薄晴旭好月能隨人悠然坐
水木靜對亦何適浩蕩難爲欲情極反無言到此惟落
穆別去憶所歷恍恍如在矚感之勞寤寐重來意未卜
所以古人云盛遊宜秉燭

送曠聲和先生還朝二首

清節稜稜舊有聲揚帆正好及秋行三年署籍新徽院
十載還朝老璽卿京洛雲高鴻雁遠江鄉月到薜蘿明
莫言鷺水今寒落茅茹於君卜彙征
欲行何事故遲遲出處之間別有思霜落不堪高士臥
時危有待鉅公持日邊聽履雲雙闕林際彈冠酒一卮
聞道長安碁局易勲名久矣動明墀

送同年姜居之宮詹入都

章江駘宕柳條新入國肩輿及晚春敢謂人情賢夢卜
却教直節豎嶙峋時危有待歌維枳廟算誰同歎積薪
聞說天朝銀信邇如君方是讀書人

代宗欲相李鄴侯為元載所忌帝勉從之約日後當

以銀為信忽除銀青大夫必知載敗已且相矣未幾果然

送吳起華前輩再起銓司二首

舉朝原是憚清真越用誰云滯長卿共道孤睽欣雨遇
更看彙泰羨茅征題才久矣懸金鏡報國居然藉石衡
聽履於茲君漸遠章門春水月潮生

檜雖稱公靜重常越用他人公不以為意

陳文正公字長卿為司勳郎時秦檜擅事惟公澹然

歸來臥閣傍垂綸日望山濤啓事新秣馬為聞忙紫省
泛舟猶喜裊清塵空庭鶴影依藤細滿路鶯聲帶柳勻
聖主只今求直諒於君依舊重銓臣

時銓曹多以事獲譴

畱別大虛宗年兄

次來韻

不盡章門一月遊開帆猶愛古城頭曾因叅佛登危閣

常許攜尊泛小舟澹蕩因風朝選樹蕭疎聽雨夜添流
遙遙煙色無窮處指點君家第幾樓

翰圃雨後贈陳景鳳山人

小苑曾無事疎慵懶著書開林巢野鶴分飯飼遊魚雨
過花光潤風生竹露徐坐來閒簡韻最喜汝同予

園居

年來漸欲侶樵漁拜石尋流也自疎漫種陶君三徑柳
却翻揚子一牀書簾垂高閣隨雲卷花滿閒庭帶月鉏
長夏不妨頻客到刪詩醉酒意何如

七夕

立秋前五日

引涼爲愛露華零野色流暉上小屏樹迫蟬聲辭赤夏

草橫螢火亂明星無能免俗書堪曝豈欲遊仙曲可聽
獨有殘荷秋未到夜深猶自散餘馨

秋日招友

時閏八月

涼夜難爲懷苦吟終未足晨起視冥鴻登高空送目何
以慰寥落古帙三兩束扶桑旣已紅新竹依然綠莫負
兩中秋重來賦籬菊

初夏舟過釣臺

余家亦有同江釣臺非嚴灘也

如煙草色澹晴空鼓枻中流事事同江岸餉耕忙野婦
石崖晞網暇漁翁風搖曉閣催波綠樹映殘陽帶雨紅
獨有釣臺青不改屹然砥峙大江東

惜春

乙亥立夏前一日

歸來久矣事田園風雨誰云匪帝恩庭有名花分姊妹
籬多修竹長兒孫幽閒不禁詩千首硯礪纔澆酒一尊
九十春光雖已去鶯聲未老綠初繁

初夏雨過家大司馬懋明先生讌集小圃有作
時同集者七人

小築環青擁石函雨餘長日映晴嵐竹林從古賢稱七
蓮社於今徑有三聽履久知高斗北彈冠應見起周南
東山依舊玄非我但有邨醪可共酣

題畫

煙雨暗重山原含筆墨氣怪石沉嶙嶙空江勢欲沸四
顧澹無容崖溜穿寒蘗爲問蓑笠翁曾網珊瑚未

夜宿頂泉寺

一榻寄高樓空山古梵迷雲深泉氣冽天近月華低老
刹靈猿護荒林怪鳥啼忽然驚曉夢不是爲聞雞

與友人夜坐

有月能消夏狂言不掩關雖然逢好友恨不住深山

元夕觀燈

參差火樹醉芳菲坐對閒吟月影微未識春光何處是
滿屏花片上羅衣

玉蘭落花

美人宜澹妝新月清而潔獨有惜花情片片拾春雪

送客

已負蘭亭約又逾寒食期晴多花發早節遠筍生遲得
句人難和為園小亦宜傷春無限思况復別君時

菊節前三日同家大司馬讌集田中丞西園兼
登危閣

便可成林壑無煩過白園如文珍小品有畫落深邨竹
石秋容澹尊彝古道存籬香兼素羽各欲媚朝昏

贈徐山人

天涯意氣總輸君且向東籬醉夕曛知采芙蓉江上去
蒹葭一水隔秋雲

乞竹二首

小春全為種花忙落盡寒英一夜霜却愛淇園青不改

欲分蒼翠入雲長

為說霜根趁雨移窗前疎密弄清姿嬋娟莫羨東風嫁
小院橫斜三兩枝

履公雪中過訪

正喜空齋話嬾殘千林曉色動雲端短橋為誦孤山句
榭拙閒煨敵晚寒

漫興

平疇列蕙澹芳塵爛熳桃花澗底春醒即抱書閒即枕
不知誰是避秦人

春分日同曾堯臣諸子飲和卿園賞海棠

容易春歸半真堪醉此園况能逢好友更喜雜方言

能為花意晴偏媚林光晚益溫深談宜向夕月色上苔
痕

春晚送蕭伯玉北上兼懷晉卿殿撰四首
高臥春浮久出山每掉頭趁茲桃葉水為泛木蘭舟已
去猶疑住即行尚恐畱之官寧若此只作向平遊
故人書每至輒欲得君來豈但為難進還憐未易才珮
聲聯曉署藜火照深杯各有千秋業毋煩念草萊
山水友朋意宦遊相與兼文歸千載後官歎十年淹江
色明行旆春風動晚帘欲裁京洛語書禁近猶嚴
豈不念離別分攜芳草春欲令當國者知有讀書人捉
鼻君難免彈冠我獨真倘逢知己語雪浪有垂綸

送友人遊武林

盛夏園林靜蕭然賦閒居彈棊更飲酒殘編手自疏偶
聞剝啄聲有客叩吾廬吾廬何所有滿架饒圖書新竹
方解籜蘭蕙且盈除陡覺天氣肅奔躍避禽魚狂飈朝
折木急溜夜穿渠感茲風雨夕對牀眠蘧蘧萬卉嗟零
亂吾生常晏如曉來雨乍晴亭臺益蕭疎溼葉戰茗煙
積潭長芙蓉客忽向余言欲理遠遊車聞說西湖好此
願久成虛丈夫志四方寧能老蘧條酌我杯中酒葵藿
間蒲蔬故人天一涯行矣勿踟躕新詩倘成帙歸期或
秋初

賀陸夢鶴明府考績二首

并序

陸侯本凌霄正氣具拂漢清輝毓秀虎林盛名久高
洛下馳聲雁塢健翮遠邁雲間會新綸謂天祿石渠
非習民事者不可而特簡以銅章紫綬惟當大任人
乃勝初試恩城爰新劓而發刃旋借仁嶽就熟路以
輕車善以迎人泯聲色於弗大仁能及物妙美利於
不言六案星馳一簾月皎凡爲批卻而導窾皆是時
訕而舉盈苟可利民寧懷悄悄之愠即稽報績不爭
赫赫之名至於露滋萱花几案塵清忠良孝友之訓
奉以朝夕若乃雲影芝樹衙齋況冷父子兄弟之間
自相友師尤爲仙令之美談抑亦世家之盛事矣某
幸深樾覆更切蘭馨盟心而附道義聲氣之中已覺

意誼可貫抵掌而商天下國家之故知爲世道所憑
茲當政成益欣望最想舊是玉皇香案之吏必仍歸
金馬祕書之班聊藉聲歌以志祝頌云爾

文人循吏總能兼六計周官首弊廉問俗每看雲擁戶
散衙祇有月窺檐庭餘圖史供餐臥坐對琴書簿米鹽
聖主只今開館閣佇將綵筆問江淹

版輿將母意何如徼得綸恩大所居二仲每來傳却鮓
諸郎相過問懸魚松庭晝掩惟聞鳥官舍朝閒好著書
世業青箱原步武看來藜火接階除

二十年不宿石蓮洞矣感賦

層巖插徑晚雲連一榻何妨枕石眠老洞翳嵐橫野樹

疎林逗月影流泉孤吟爲喜消殘夜清夢還疑續往年
曉起不堪懷古遠滿林荒草亂荒煙

秋意

高閣飛梧影亂煙薊門雲樹遠依然殷勤爲憶天街月
偏寄蘆花照釣船

己卯元日試筆

林居忽覺又春還夢繞彤墀第幾班似有微情懸斗極
可容高臥理青山閒燒榭葉溫邨釀坐對梅花冷笑顏
最是烽煙傳未靖草茅何以答時艱

賀周湛宇先生八十壽

并序

先生秉道物身傳經淑世司教立伊川之雪蘇湖望

隆居鄉高太丘之風月旦名重時維四月壽躋八旬
子孫之綵衣滿朝親知之瓊袞盈帙王子于天以母
故而深渭陽之誼舍弟調甫以母之母故而欽河洛
之源共期一言以當三爵爲祝鶴算用歌鹿峰

鹿角峰頭接天碧明霞每抱卿雲立匏尊土鼓風猶存
石作瓊漿玉作液中有仙翁善引年先世營柳兼愛蓮
淵源自昔傳五馬學業於今羨三鱣五馬三鱣何所有
鄉里人人皈祭酒鐸聲久振浙江潮講堂不數橫浦舊
賦將歸來不記春南山一曲共嶙峋十經閒居稱道祖
紫萼綠葵有彥倫猶記仲氏文藻絢季更獻賦明光殿
孝友人爭誦所希堦篋迭奏相筆研仲季何年付電光

先生意氣獨昂藏衣表立骨同鶴瘦雲間摩翮共鵬翔
松下傳棊夜復曉燈前作字蠅頭小有時看雲山外岫
有時忘機溪邊鳥於今八十髮仍黧梅雨習習谷草齊
不必商山說角里不須渭水羨磻谿商山磻谿正蒼莽
玉蘭芝樹芊芊長橫經沒義似環橋舞綵含飴映朝幌
從來憲老正乞言王氏有槐于有門天子況復重耆
舊割脯賜輪佇帝恩我家有翁八旬一家封大司馬蟒玉衣
冠正繞膝精神奕奕如壯年上壽遠期真可必又聞劉
翁九十餘勝所先生口不釋吟手自書極星近日聚吾里令人
依稀想皇初櫻筍開時堪結夏三翁相距不一舍大家
杖履共相尋歲歲好聯耆英社

題郭學博小影

石壁長松胡爲者羅生筆墨亦瀟灑一鶴獨鳴小院西
疎林漠漠秀而野忽然其間著老翁傳神正在阿堵中
白髮蕭蕭倚筇立山澤之癯明雙瞳攜琴抱書欲何往
山外茅亭似獨賞溪邊可釣酒可沽令人還作天際想
文采風流憶昔年明光射策氣翩翩幾處蘇湖留清範
胷羅萬斛口談天至今歸田已數載雪顙如銀氣如海
有時選韻飛珠玉有時放櫂歌欵乃況復家多好收藏
賞鑒真不失毫芒我來徧觀光奪目法物淋漓古墨香
有此不妨痛飲酒庭階森森皆瓊玖爲當再度三十年
還期爲君酌大斗

楚遊草

庚辰自銓司謫楚放舟彭蠡登匡廬溯江而上抵武昌
詩曰楚遊時楚猶完楚也余去楚不二年三湘七澤賊
騎蹂躪繼而悍將驕兵幾無寧日黃鶴不歸芳草路斷
晴川之樹銷於烽燧之煙傷心楚澤不堪再問當日遷
客得南眺洞庭北瞻漢水者無在非 主恩也用存此
詩借以存楚感慨斯遊有如昨日

詩三十五首

珠磯晚泊

旅望天方闊茫然一葦輕沙迴雙岸曲日落兩湖明衰
柳偏遲霧寒潮直到城今宵初見月澹遠此中情

鄱陽曉發

一水蕩晴空凝眸四望同天低湖氣接岸遠野煙籠澹
日朝涵沫高帆曉信風匡廬知不杳星漢若為通

舟過屏風山狂飈大作遂作累日泊望五老有
懷

迅帆一葉鄱湖側晴美中流頗氣色須臾蘋末輕颺起
水光鱗鱗寒日昃汀雁盤風細霧來江豚吹浪雲頭黑
急呼長年泊林麓篙師櫓史總無力中流維纜石磯邊
濤影兼天未肯息東南一派積翠懸煙斷霞封橫復仄
眠餐臥坐皆五老飛流直下銀河泐

望湖亭

澤國寒侵景似逋登臨惟愛一亭孤煙光澹漫疑浮楚
草樹蒼茫且蔽吳古廟碑殘餘往偈長湖氣靄憶雄圖
客懷渺渺知何寄咫尺雲山入望無

阻風青山頭看月

夕照沈沈響檜杉連宵樵影薄晴巖燈明晚市邨煙合
月到平湖野草萎無數小山涵極浦幾行疎雁落歸帆
長空如畫風初歇入夜輕寒上客衫

泊孤山二首

水月澹清輝寒崖濺雨飛全湖嵐影盡亂火夜漁歸一
柱中流接千山四望微聲聲更漏永何處可忘機
宮亭水漫連天碧駭浪奔龍含日赤雨氣溟濛飛瀑迴

忽驚半壁天門逸深蛟夜舞渦涎盤衆山倒湧煙橫積
萬頃波光只一抹小米皺藍大斧劈上有浮圖絕瀨懸
爲砥狂瀾尚嫌瘠絳黛色分中邊景雲霞吞吐朝還夕
乾坤似欲敵峻嶒遑顧帆檣愁旅舶紙鳶高飛拜河神
賈人低語長年迫我但十年未經此山靈莫笑爲生客
幾夜月明遙對君肅然把酒情偏劇欲施粉本巧爲摹
是山是水還是石輕颺一葉過湖來曾中有語何格格
與君再訂歸舟期曠臨島嶼大搜索

仲冬望前一日初度偶成

漫遊浮寄楚雲偏心緒無端欲扣舷沔漢空懷臣似水
江湖有夢客還遷纔離鄉國成千里爲數知非僅五年

入望黃州原不遠誰裁鶴曲到江邊

蘇子瞻生日有客作鶴南飛曲以祝之

江州感懷

寒潮曾不過湓城楚客蕭然此夜情
九派流分黃鶴遠
三巴霜落白雲橫
煙封廬岳輪僧夢
雁怯衡陽盡旅聲
漫拭青山談去住
琵琶未唱已心驚

雨泊

舟泊潯陽是楚江
濤聲風力總難降
寒分遠黛孤棲渚
暮隱荒林小吠尢
搖落客心歸戍鼓
蕭疎雨點暗篷窗
深燈幸有人堪對
不盡幽懷付玉缸

鄔家穴月明如晝望隔江青山聞有歌聲

蕭蕭蘆葉繫江湄
子夜吳歌動客思
極浦歸帆煙共遠

亂山隔岸晚偏宜
光搖水國疎千樹
影到閒汀白一時
把酒長天貪夜永
微風初裊動寒枝

登蘄陽浮玉磯與僧惟空閒話

飛樓虛敞薄雲端
客泛扁舟泊石盤
山勢遙連巫峽曲
河流不放楚天寬
瀟湘岸遠人偏度
羽檄風馳木落寒
幸遇老僧閒對語
鐘聲斜倚夕陽殘

舟行

江流如駛度三湘
每對晴霞小舉觴
忽憶乘槎張博望
還臨潑墨米襄陽
幾家茅屋圍殘柳
何處漁歌出短牆
搖落西風無限思
衡雲遙睇正蒼茫

巴河感事

滄洲西下奔流速霞脚遙連斷岸曲渡喧云是古巴河
停橈聞趁明月宿晚煙漠漠炊巫雲邨歌遠裂蘄陽竹
爲說昨年兵火餘春燕尚未巢梁木寒曾把槩夜求魚
野老拾蘆朝補屋我方推篷倚平沙亭臺迎望搖深綠
匠石勞勞規度餘此中知有新枚卜先憂後樂意何如
未登岳陽心已促呼童酌酒聊成醉明日青山待晴旭

陽羅

偶與霜江泊幽懷未可論一從經喪亂幾度舊川原石
岸留殘骨平沙露舊痕危橋蒼蘚合荒樹碧雲屯移屋
惟成野過河盡結邨老槐支古廟廢驛臥頽垣小港還
通市孤商偶度門祇餘人去晚渡口夕陽暄

欲遊赤壁以風利不得泊慨然有作爲訂前期
昨夜月明望赤壁山川指點如歷歷長年不解遊子情
曉趁風帆疾如鷁濤聲若瀉孫劉恨石浪猶聞吳蜀激
披衣晨起看殘星回首臨臯心倍適會當載酒權船回
飽聽江上吹蘆笛

江行漫興三首

蹤迹何堪寄楚萍遙天霜落夜船清孤帆欲泊知何地
鼓打寒城已二更

杖頭錢買一雙鱸茅店邨醪且自酌爲憶昨年風雨夜
小窗撥火著潛夫

簡點殘編意每豪輕煙爲喜浥蘭膏笥中自有梅花賦

不爲行吟讀楚騷

又六首

匡山青可數蠹渚闊而深未識人家遠炊煙半出林
河流涌急灘浪花濺雲溼遙望牧童歸暮鷓牛背立
四山不全出長河澹波影爲聽鄰舟曲疑是篴篥引
莫裁遊子衣高天未肯冬霜與月俱白吹落何寺鐘
刺繡蕪黃熟微風剪刀冷相攜望新月回身照疎影
遠水護平沙樵聲響林樾祇疑雲封外應有寒梅發

黃鶴樓

長空拍浪翼樓危爲俯層流聽碧吹涌月有臺餘蝕字
擲桃無樹綴殘碑關河望逐衡雲斷今古愁分峽夢遲

徙倚不堪詞客恨急呼仙子對寒巖

江上值雪做歐陽公體限不以鹽玉鶴鷺絮蝶
飛舞之類爲比仍不使皓白潔素等字次坡公

韻

六花撩亂集寒葉溶溶碧漢映輕雪飄空忽覺衣裘重
方珪圓璧兩奇絕灞橋驢背句難成剡舫山陰路還折
萬戶爨薪溼雲繞千溪落木閒流滅枯腸搜剔鬚莖斷
凍腕皸瘃手筆掣參差樓閣石冥濛上下帆檣浪紋纈
未能高臥原無意欲署冰函總不屑淮蔡莫襲暮笳哀
歲行將盡供一瞥客窗呼酒聊薄醉澤畔行吟向誰說
但餘字字挾風霜廣平賦就心如鐵

野泊

野望空無際舟停未敢安水明天有色邨遠月同看斷
岸依鄰浦聯橋倚急灘微情聊自慰得句夜燈殘

感興二首

君恩慙未報不敢薄微官野水輕千里孤舟共一寒每
聞歌郢調輒欲藝湘蘭去住曾何定悠悠未忍看
泊久難爲客舟閒可以家雖然依廣漢尚不近長沙水
國殘年逼江城落日斜蕭條無限思極目數歸鴉

赤壁懷古

臘八次日

橫巖劈抹抱城闔危磴層層倚礪滑石氣浮煙籠紺羽
湖光設色影丹燐當年風月憐詞客千古江山老逐臣

細讀殘碑荒草外惟餘寒柳待春新

偶行

偶欲尋幽去行行蹋淺沙荒邨舍柳色小徑見梅花水
落湖難闊天空日易斜孤山仍在望歲晚問歸槎

寇亂

時泊武昌舟中

歸帆一葉寒江裏道經赤壁樊山樣忽聞寇渡古巴河
鶴唳風聲疾如駛巴河舊是兵燹餘墟煙漠漠半荒壘
傳說寇來總未知焚掠曾不餘寸葦原野膏污看流血
爭渡可掬舟中指黑雲慘澹暮鴉哀舊鬼銜悲叫新鬼
須臾霧薄夜色孤澄潭激灩月如洗星星列炬自東來
十八邨燄一時起天淵陡覺魚鳥亂平沙火互數十里

塵馬奔逐金石烈赤光燐燐照江水行行逼近齊安城
萬家呼號不停晷抱頭鼠竄覓漁舸盡攜子婦向南徙
壽昌隔岸震千鄰家家登陴挾弓鎧客舟孤泊八口棲
盈盈相距尺有咫驚心離亂不成眠率彼曠野歌虎兕
因憶流氛十年來所過蹂躪孰嚮邇何人爲建和戎策
大吏囚繫小吏死從來孽燄總未銷詭言若可鞭箠使
人人忍賊遺君父九重宵旰徒拊髀特遣元戎出黃扉
蟒玉炫爛照文綺親灑宸翰御墨鮮劔賜尚方半壁倚
禁旅千隊金鼓喧寵遇如茲實難擬羽檄飛馳三月餘
曾不加遺煩一矢潢池猖獗幾時休笑笑子黎誰桑梓
十萬金錢供揮擲敲吸幾盡中原髓四郊多壘大夫羞

肉食謀國真可鄙媿我南遷復遲迴目擊心傷徒憂杞
誰秉國成籌帷幄隆恩何以報天子此地古來爭戰
場豈謂聖朝亦爾爾書生不識兜鍪色賦詩橫槊酒
堪醜但得四海干戈寧歸來藜藿亦甘矣起視長河猶
未滅波浪翻空正瀾瀾

贈內

全無兒女態清遠自如如刺繡焚香外翻經禮佛餘真
堪呼小友不異讀奇書客路同來往時時一起予

曹洞山以二月望後三日舉七旬觴時且移家
東歸兼以爲別并申後約

才名子建舊仙仙七十於君是小年酌兕正當花發後

生天喜在佛成前酬恩一劔心仍赤問道三函草尚玄
此去廬山添一老從今不數五峰巔

石園全集卷第三

石園全集卷第四

出山賸語

余自壬申歸里豐草長林得以終老不謂又辱啓事徒
深報國之心實乏匡時之略無當遠志真貽譏於小草
且遭時多難奄忽至此甚悔出山之非計矣往事如夢
僅存數詩見喪失頗多而賸語亦何足存焉所不忍棄
者誠以志出處之日月云爾

詩十三首

康辰冬初奉光祿命入朝舟次漫興四首

林居劣得十年閒捉鼻何因強出山豈謂金門堪大隱
故教勳署點微班情懸報國心仍赤念到憂時鬢已斑

小草於今聊爾耳不將疎散盡從刪
擊楫漫歌行路難相看鷁首向長安
掄才舊已慙金鏡竊祿今還列大官
霜月夜鐘隨遠水江天曉霧冒晴巒
山川信美遊人意雁影橫空借羽翰

最難別處是家園鎮日維舟傷水邨
醉酒談心存友誼餐風宿露亦君恩
初寒衾薄客懷重小市灘驕晚渡
喧徙倚蓬窗勞極目石尤留止若爲援

聖世難容避詔巖離愁無數浣征衫
非關吏部曾耽飲

却爲醉鄉可寄銜時補良醞滿目中原仍劔戟繫情故國是松

杉孤舟野岸憑棲泊霜柳依依點去帆

分園全舟登同江劉晉卿殿撰載酒言別贈以扇頭二

詩依韻答之

竊祿無端赴聖朝依依魂夢繞清宵
晴江雁落人難度夜月寒生酒易消
逋客閒情同避世孤臣直節久干
霄行行判袂懷方始徙倚西風望處遼
林間偕臥久無虞何事分攜歎德孤
舟行白露隨官冷霜落黃花對酒癯
我媿長征良友遠君懷憂國古人俱
紛紛撻伐皆無策廟算何年是賜租

登生米至德宮

自是真人宅巋然石骨懸雙流分野水
一柱倚遙天亂竹寒沙徑殘楊古廟煙
登臨呼小艇來往意仙仙人日喜晴同
蕭伯玉小飲僧雪藏手談有作

為延佳氣入窗新
曉浥晴煙動野蘋
梅落輕風愁作客
莫開勝日喜逢人
山畱殘雪供朝旭
岸斷餘濤蕩早春
此際真堪僧共友
閒敲碁子醉江濱

樅陽旅泊

幾日空江泊
遲留旅客情
沙明楊子岸
水接皖公城
春氣初含柳
林花未轉鶯
臨風閒悵望
舟動晚潮生

初夏衍園即事二首

亂疊成園即便佳
登臨略不費芒鞋
為疑此外無多地
恰好於中置小齋
巖脚通泉滋藕舫
樓頭倚石落松釵
未須更覓歌吹路
纔渡橋來意已諧

漫將津逮擁名函
即事文心總不凡
偶以嵐煙供筆墨

遂留皴瘦譜林巖
高松偃蓋亭為護
小閣支頤石作嵌
新茗古香堪靜對
移尊還就聽呢喃

春暮集影園贈鄭超宗二首

似入深邨去
居然水石兼
壑陰低草徑
柳隙度檣尖
鶴夢頻通楫
鶯啼或在檐
誰家亭樹好
風景若為添
小築傍城闈
周遭水數巡
溪山競入句
煙雨亂披皴
結屋多藏葉
翻書每借鄰
更聞來好友
繫艇澗之濱

心遠廬吟略

淵明飲酒諸詩
隨意寫來咸臻
其妙其曰結廬
在人境而無車
馬喧問君何能
爾心遠地自偏
蓋終在人境安
能無車馬之喧
亦惟此心自遠
耳此余心遠廬
所自始

也淵明篇末又云此中有真意欲辨已忘言正復鬱鬱
誰語故曰吟略見刪後存者僅此曾懷難盡者固如是
乎余於甲申後讀淵明詩知古人論世之法想淵明詩
亦寧止是其存者亦其大略焉爾

詩六首

甲申中秋同熊雪堂銀臺朱子美吏垣分韻三
首

愁讀離騷大小招孤光寂歷鎖寒寮障塵有客歌紈扇
問月何心蹋野橋墜葉聲隨驚鵲散疎花影傍去鴻遙
長安是處催刀尺丹盡霜楓一夜條
冰蟾濯魄爲誰清砧杵聲聲怨未平幾度懷人吹玉笛

無端客夢寄桃笙清暉一似今宵減鼓角空驚昨夜情
太液池邊無限月漏聲空自照愁城

何來秋色露華空絃管依然媿樂工新桂欲飄香粟冷
殘荷如墜舞衣紅樓邊坐嘯歸秦戍江上徵歌憶漢宮
繞砌蛩聲啼漸老閒搔短鬢對金風

夏日臥病

雨過花香滿一庭天涯寥落醉還醒歌殘玉版新蓮葉
夢憶江皋舊草亭南畝暮連雲共遠西山朝對眼偏青
勞勞塵事情無限長夏臣門盡日扃

病餘聞家難有懷所戚却寄代簡

天涯嗟寂莫一病輒經旬臥聽殘鶯晚喧驚乳燕新葵

猶能衛足智乃不謀身淒惻千秋事艱危萬里人家園
仍戰伐廬舍盡荆榛八口知誰寄孤蹤孰與陳徒然憂
逆旅忽爾憶情親一別章江渡頻移斗柄春山河滄海
異患難死生頻豈不懷鄉土奚能脫苦辛生寧惟老蜀
悔却是遊秦短髮蕭蕭落餘生念念嗔崢嶸微管仲簪
紱媿栖筠夢繞龍沙國神馳鷺水濱翁今營白業可復
問朱闈芳草王孫路煙波隱士綸善爲知最樂道在勿
憂貧欲賦歸來菊言尋江上尊登山空有履漉酒恐無
巾笏地應遲我相將好結鄰

秋日送友西歸兼懷張湛虛同年

冉冉清秋半泠泠素葉飄老成珍去國綸眷寵行軺天

意全者宿卿銜尚舊朝靈光尊魯殿渭澗溯秦橋細雨
丹楓暗輕寒白鼻驕遊思經華岳客路向中條夫子關
西重真人隴右標世方隆劔戟道本慎漁樵我亦行歸
隱翁先且策鑣離情驚落日別夢話深宵自古皆流寓
於今漫寂寥賀蘭如故里滄水況澄滲寄語平生友關
河雁字遙加餐咸努力霜鬢各蕭蕭

潞遊草

潞遊遊潞河也津署寄棲無聊漫借一葉與波上下不
減江潭澤畔即景輒吟吟幾成帙昔人云坡公過嶺杜
陵入蜀歸而詩益工余往返不三百里而遙時僅浹旬
其不工也固宜燕語蟬鳴天機自觸余室中有精研此

道者當歸以質之東方曼倩避世金馬門割肉以遺細
君傳爲美談余江湖汗漫遺以數行澹墨較之曼倩似
爲稍韻即不工亦可一笑相視耳

詩四十一首

天津晚發

無端鼓楫發津門萬井煙濃野霧昏遠近帆檣依凍岸
翻飛鷗鷺沒潮痕沙明古戍連雲斷水合雙流赴海奔
燈火迷離城外市一林斜月到前邨
不舟宿者十年矣夜泊西沽風定潮平月色如
練慨然有作
塵思今夜盡水宿十年緣遠釣漁分火荒邨鳥噪船月

明澄遠練潮落散平煙對此心纔寂閒消一枕眠

羅篁菴司成相期作通灣良晤溯流從之

客棲悲寂莫慷慨此舟行鳧泛隨雲影鷓飛聽水聲措
爐焚古篆淪茗煮孤鐺曲岸荒雲冷長河澹月明愁多
書是癖漏短夢無成豈不懷歸去終焉念友生分攜知
已淚離亂故園情耿耿衷腸結相逢倘共傾

舟抵務關聞篁菴已先至河干矣相對悲喜交
集小酌不數行風雨大作徹旦不休共臥蓬窗
濤聲如沸曉起別去黯然有作

故人車馬出長楊久客相逢尚異鄉半載夢魂悲落日
一宵風雨話連牀家山復見干戈滿道路空憐草樹荒

尊酒孤帆聊共對，可堪分手又河梁。

落日行

落日扁舟潞河曲，霏微雨色澄波綠。微醺偃息不成眠，起聞邪許挽皇木。鱗甲金碧照斜陽，小者榱桷大棟梁。爲言移自鍾山側，不辨長樂與未央。一水悠悠幾千里，牽湖之民亦勞止。半索金錢半鞭箠，富者逋逃貧者死。憶昔虎踞擁龍蟠，六朝佳麗簇雲端。一朝銅駝委荆棘，果愚零亂翡翠殘。曦影帶寒鴉，蓬萊問淺沙。君不見秦關三月咸陽火，灰沈浩劫空煙鎖。又不見漢家宮名三十六，荒草迷離走狐兔。雀臺抱鄴流，隋苑侈迷樓。從來滄桑變不盡，古今愁笛聲吹徹。梅花月白鷺鳥衣，誰殿

關

舟夜

我以杼勞結揚舲，蕩煙水海氣蒸煩冤。餘光照浣洗眷言，褰芳杜興屬良難已。謂當尋南征，云何偏北指。仰睇黃雲落，俯看碧流駛。所思寧在遠，同心者誰子。念之苦難寐，倒著衣裳起。細雨澹微月，高樹沐清泚。矯首望河漢，龍沙幾千里。斷草啞皓禽，遙林叫蒼兕。睽隔發長歎，東歸誠莫擬。寒暄殊物候，流坎有至理。譬彼江潭客，與波上下耳。悠悠問行路，擲揄聽山鬼。

潞灣古寺

一葉扁舟潞水涯，蕭然野寺寄空齋。苔封老碣文全蝕，

土臥殘鐘草半埋鳥雀時來巢廢殿牛羊漫過齧枯茨
祇餘夜月無今古來往閒窗照斷階

賈老醇如隱潞灣有偕隱者庭植花樹楚楚精
焦氏易客到具洗腆棊酒夷然搢紳先生多與
遊者

水木澹交加琴簫老歲華弈碁忘永晝酌酒泛流霞圃
種先生柳門多長者車開窗閒點易漁唱晚煙斜

初聞子規

一名催耕鳥

屯戍依依壠麥齊塞歌聲度牧樵西子規未曉桑田改
猶自催耕帶血啼

戴巖學奉常作畫寄家中丞留懸僧房賞玩之

餘若置身丘壑間二首

雲山爭翳蒼洞壑俯靈幽氣潤晴為雨煙深夏欲秋何
人呼立本有客話營丘坐臥於其下翛然得勝遊
不能窺所以一望但森蕭木末懸泉險巖光蔽路遙閒
亭環水石傑閣倚雲霄謬欲還添我扶筇過小橋

東內

客裏偏為客居然有別離鳥棲欹枕後月上憶君時筆
墨從兒好辛勤賴母慈寄言歸不遠把酒讀新詩

午浴

古聖尚銘盤高人每礪齒翳翳萬斛塵泠泠笑杯水豈
無佛圖腸誰污巢由耳蛟鯢亦鮪鮒湖海同沼沚遙思

彼何人伐毛而洗髓漁父愛滄浪行歌聽孺子
陳百史金豈凡二少宰書至期余入都一笑謝
之
經時未報故人書河上雙雙剖鯉魚為念煙波同鷺羽
敢因鐘鼓駭鷄居度刃共佩藤花落鄭履分聲水鑑餘
但得濟時公等在浮生何必不樵漁

天地皆無謂關山遠奈何深林啼怪鳥小笠挂寒柯欲
灑新亭淚空懷白石歌庭閒人睡足清夢向誰過

讀太玄經

玄庭何寂莫千古仰斯文問字真奇僻談經每鬱煜幽

窺周易祕義共法言芬謂宜藏金石寧待類典墳符命
原不涉豐甄豈同羣校書宮殿紀投閣董狐聞遭世良
多苦愁心每若焚觀其傳筆墨別自有氤氳凍水勞神
久新安析理殷誰言堪覆瓿測議任紛紛

暑憩古槐下同野老弈

誰語寒山石移牀就古陰開枰尋野老對酒勸來禽風
動涼生葉日斜暑過林閒情何所極搔首一長吟

望西山六首

芙蓉削峙倚天孤一派菁蔥儼畫圖極目不堪明白望
煙嵐斷落任模糊
夏雲幻結曉光迷皓鶴玄猿日夜啼為問幽宮春草色

行人泣指亂峰西
黃金臺畔廣陽城
山色依然古木平
燕趙悲歌空易水
蘆溝深夜月還明
九龍池下水滌洄
聞道鱗鱗盡劫灰
經過御溝嗚咽甚
聲聲流出潞河來
老樹蕭森萬瓦黃
春秋香火付貂璫
為傳殿閣重重閉
結伴焚脩住上方
下同裡法亦
曉浴扶桑暮紫霞
營屯鐵騎鎮黃花
只今山後無烽火
一曲笳聲夕照斜

寓通灣戚公亮數度相過公亮里人也時與雍
選詩以贈之

偶寄潞河濱過從載酒頻浴蘭同好友敬梓有鄉人築
館金臺重環橋蘚水新明光終獻賦還以慰交親
暑寐

薊北調冰日江南雪藕時林空雲宿早歲閏暑來遲海
嶼魚龍幻山池雁鶩滋惟余閒冷客偏與夢相期

別潞河

負海原無力藏舟事亦艱已同涼月至又載野雲還雁
去沙逾白城空草不刪薄遊應紀此秋水曲河灣
朝發長河灣弭節里二泗余故奇其名褰裳特一至遠
眺凜崔巍薄叢翳蔥翠舍舟而徒行水氣驅炎熾風雨

喧逐來半道奔林避豈不念沮洳高情託遙寄士女紛
沓擁鉦鼓間旗幟或駕青牛幕或策錦絡轡三五亦成
羣什伯若相企摩肩入道院迴睇互瞻視霖霖透綺縠
颼颼響佩珥嫫媠各有以中亦雜椎髻纔望金仙容五
體盡投地朱函擲銀錢黃紙宣姓字溼雲繞爐煙陌灰
縈飛燧老樹糾藤蘿豐碑負鼻肩肅然爲起敬聲靈知
有異仰止宮觀額先朝有敕賜羽客說當年功以護運
誌夏每孟仲交舳舨如列肆寶馬七香車結隊京城出
燈燭徹宵旦畫舫繡騎吹載酒競欣賞徵歌選明媚節
近浴蘭芬景埒采蓮芰市且聚百物技每呈諸戲環堵
屋廬接炊汲互肄萃雞犬麥秋登牛羊邨社醉今曾幾
何時轉眼成往事敗垣空瓦礫殘階長荆茨古木千餘
載幾以斧斤試神乃禡其魄逡巡始病悸以茲壇閣存
嚴翼得無墜遊謁較疇昔曾不及三四語罷覺欬噓令
人動遐思挑燈聊載筆惆悵未成寐

舟行雜詠五首

全不因人熱虛舟五月寒低飛驚溼鳥帶雨過前灘
微波盪輕舟遠渚出柔櫓昨夜急雨過鼓岸新成浦
河水曲曲流帆檣相迴互已行十里餘猶見來處樹
風波漫相關往來原無意漁燈入浦深驚見鴛鴦睡
相看問河流似亦生百慮直沽徑入海不得向南去

遣懷

偶依星渚泛蘭橈雲水眠餐暑路銷莫遣閒情聊染翰
寧將逸興問吹簫波光朝夕能深淺樹色蒼茫異近遙
是處麥畦新耒耨幾家籬落舊漁樵晴煙鶯鷺凌朝旭
夜雨魚龍赴落潮低岸洲迴沈翡翠高歌版築憶嫖姚
沈吟惟寄書千帙魄礪還澆酒一瓢短髮搔疑分鶴羽
輕衫製恐泣鮫綃采蓮爲愛吳歛好權桂寧煩楚客招
遠浦浪翻驚鷓鴣深林枝寄羨鷦鷯半生蹤迹成飄泊
萬里音書歎寂寥海國荒荒空極目長吟矯首附層霄

返津

吟草微成帙逢題信手拈波瀾供老眼綺藻質香奩漫
作敲推慣還愁簡訂嚴茲遊曾否負飛翼問鷓鴣

重過先總憲祠

春光餘幾日遊事已茫然重過先祠下仍行古渡前野
棠榮落日疎柳澹邨煙祇有東流水依稀似去年

初夏集唐三首

授鉞辭金殿英英濟舊勳鹽梅推上宰翰墨動新文綵
仗迎春日霓旌卷夜雲試迴滄海權蹈舞向南薰
西園春欲暮何事動行軒野步漁聲溢孤舟夜浪翻曉
風吹戍角甘雨洗荒邨惟見林花落鳴琴靜對言
海上生明月鶯歌暖正繇晴煙和草色夜雨長溪痕野
店濃花發新詩酌茗論平明添好況步履到柴門

雪日潞河訪友不值

但應高士臥漫爾出河灣豈爲尋梅去真成訪戴還拂
衣分氅素落帽染纓斑斗酒寧堪醉歸來且閉關

贈孫秀峰老翁守戎父也三子皆列戎行浙人
而占籍潞河

春滿荒郊柳著煙閒尋野老倍陶然吳山故國三千里
潞水浮家二十年虎帳談兵秋塞外蠅頭作字夜燈前
登壇羨有河東鳳杖屨翩翩意自仙

古劍爲張幼量

霜華斫水胭脂赤千百年來無消息鷓鴣朝瑩刺蒺藜
神物津聯土花碧錯落精芒顯且藏綠鱗紫電蟠文章
壯士悲歌鮫人舞寧辨莫邪與干將吁嗟乎堇山未開

越溪瀾瀾有文誰招無石可砥絕代之珍未陸沈羣騃
萬都何足擬高齋風雨夜深聞殷勤寄語張公子

石園全集卷第四

天涯却爲老兄留清衙積雪晴光轉畫戟凝寒海氣浮
獨有鄉園頻入夢閒身今已付滄洲

詩隨筆

脫却朝衣賦遂初生涯只合侶樵漁春來勝事還堪賞
婦解吟詩子讀書

和王鐵山少司空

長堤漠漠散荒煙滿路寒鴉噪野田世事波濤舟楫外
中原涕淚酒杯前關河夢斷殘歸鶴霄漢星迴冷麗娟
何處笳音催晚角牙旗獵獵水雲邊

春社後三日二首

朝來日暖放蠶衙夢到家山未到家春去每思河畔草

泉新誰寄雨前茶閒觀燕子營新宇忽聽鶯聲問落花
記得江邨邨社後闐闐豎鼓雜鳴蛙

盡日無人到楊花故故飛忽驚新雨過幸未典春衣

寒食

春深曾未事春遊每到花開憶故丘是處烽煙寧禁火
誰家荆棘可浮舟杏供酥酪歸營戍柳暗鞦韆入畫樓
寂莫漢宮空悵望鶯聲無柰喚閒愁

清明日津門同家中丞紫函拜忠肅叔祖遺祠
感賦三首

凜然生氣自千秋共說甘棠此地留海國旌旄堪繼武
天涯書劔媿詒謀斷魂草色行人度濺涕煙波鳥語愁

爲肖音容疑彷彿一尊寒薦古河流
相將兄弟拜遺祠祖德於今永去思寒食禁煙無舊火
峴山墮淚有殘碑荒城抱水晴沙合老樹含花夕照遲
世事蒼茫那可問傷心敢令九原知
曾隨閱射古城西壁壘新營甲仗齊此日黃埃呼斷雁
當時白羽走潛鯢菲微柳色縈新綠歷落潮聲拍舊堤
二十餘年成底事鄉關極目野雲迷

展先祠後同鐵山少司空泛舟縱飲歸而月已

上矣

十年未上木蘭船恰好輕舳載兩仙春事蹉跎芳草外
客懷寥落夕陽前徵歌漫逐波聲發痛飲真堪海氣連

爲愛月明歸故晚滿城燈火起新煙

送王鐵山少司空南歸五首

并序

丁亥春夏間余與鐵山少司空先後解組歲晚出都
門寓津門者數閱月春風夜月時相往過彈棊酌酒
走馬泛舟每遊必醉醉必有詩坡公所謂何處無月
獨少閒人如吾兩人若爲今日語也冰判水生約以
方舟南歸逡巡徂夏會聞江鄉多故余不得不遲遲
其行司空飄然先發殊深離別之感得詩五章輒以
爲贈情之所至不自計其工拙秋風一起余亦思卜
居甓湖故未及之

辜負津門幾月畱那堪客裏送行舟天涯蹤迹憐同病

岐路煙光忍獨遊，柳色晴飛紫漢苑。
桃花水直到秦郵，君家一似春歸易。
笑指元龍百尺樓。

海國潮生日欲斜，樓船簫鼓雜鳴笳。
風翻麥浪移帆影，岸落榆錢隱釣叉。
開徑未荒彭澤柳，爲園却種邵平瓜。
殷勤十里雷塘路，賸水殘山帶暮霞。

夏木初森鳥亂啼，櫂歌聲度野雲低。
一尊夜對滄江晚，二水晴分草樹迷。
歸去高風推甍社，由來往事話隋隄。
照人祇有三沽月，爲寄愁心過竹西。
何事東歸計未成，纔聞擊楫旅魂驚。
風生成鼓干戈滿，櫂入淮河枕簟清。
碁局每能敲夜月，酒兵時與破愁城。
離懷別有關心處，極目煙波去住情。

留君無柰妒君還，沙暗河橋水一灣。
身世漫憐雙鬢老，江湖寧得幾人閒。
登樓有賦宜招隱，卜築無錢寄買山。
爲愛醉鄉深處好，秋風應待埽柴關。

春暮

餘寒全未試春紗，雨過廉纖夜浣花。
遊屐分香霑野徑，靚妝落翠悵天涯。
微雲濡葉閒飄砌，薄霧吹煙細品茶。
爲惜芳菲歌窈窕，碧窗桐影亂橫斜。

初夏夜夢得詩一聯起而足成之

他鄉爲客久徒倚，問琴尊微徑通雲脚。
空庭受月痕，漏聲因夏促。
蟲響入宵緜，歸翼飛難定。
悠悠想故園。

古寺

古寺倚巖岼秋空沍露寒徑深來客少僧老得禪安乞
米朝煙斷翻經夜月殘山林應有癖欲去且盤桓

立春日雪

棲託天涯少結鄰荒城愁見歲華新忽驚雪片催殘臘
為報梅花逗早春榆社辛盤深客夢關山羌笛暗邊城
閒挑菜甲供邨釀且共妻兒潞水濱

人日

野館春生又一時青韶漸麗日遲遲久經冀北開萸葉
空憶江南唱竹枝思發每驚歸雁語故人誰寄草堂詩
菜羹煮似蓴羹美依舊風光客子知

春日大雪喜聽兒子讀書

飛霰流輝尺又盈東風昨夜度寒清河冰欲解花難結
曉日初和絮暫縈閒砌樹凝分玉色小窗檐溜亂書聲
為言此際尋春好驢背詩思動旅情

歸夢寓鈔

舟發潞水歸矣然及八寶仍寓焉歸仍夢耶嗟乎十載
飄零幾度患難黃梁南柯閱歷殆盡豈不懷歸而猶浮
家泛宅寄棲於委巷長橋之間其寤也夫昔人云情橫
於內而性伏必外寓於物而後遣寓久則溺心為當然
非勝是而易之則鬱而不開故余之觸景而鳴亦因求
所以勝之之道乎

詩三十三首

歸舟初發津門次友人韻二首

舟行迢遞指江鄉滿路桃花映水光蹤迹原應歸洛社
風波何地匪瞿塘逢人只合開青眼閱世寧堪問熱腸
從此湖山漁笠穩篷窗冥想即濠梁

芳草離離別帝鄉還餘清夢繞明光風帆幾幅隨征戍
水宿連宵傍野塘歸去依山留傲骨愁來得句覓枯腸
懷人漸覺京華遠落月空疑照屋梁

次流河大風

飽歷風濤萬慮休驚飈奚事拍河流氣噓鶩蜃千帆亂
波撼魚龍一葉浮埽盡落花空舞院何來細雨問靈湫
旱時終宵數起難成寐不待尊鱸憶故丘

感懷

牽舟細細數歸程風雨連朝擁去旌一路漁歌如贈答
舊時柳色故將迎花飛短櫂三春暮燕掠長河百感生
滿地江湖波浪闊片帆寧與海鷗爭

泊南陽偶過梁家園荒涼甚矣獨湖光山色依
依可人

荒徑蕭疎草滿庭離離花影護殘局柳巡石磴搖深綠
山帶平湖送遠青亂浦分流蘆荻長游魚驚撥鷺鷁腥
野橋試問何年斷一水盈盈隔小亭

內人夢中得句且有一飯必報語口占志之

紗窗曉影日遲遲春夢無端動客思為憶千金酬一飯

醒來猶記數行詩

送員鶴生司李之任南安

折柳尊前雁度遙天涯送客易魂消
秋風庾嶺三千里明月邗溝廿四橋
知有清光隨湛露恨無短檝溯寒潮

濂溪峻節依然在

濂溪先生嘗為南安司李

看渡芙蓉涉紫霄

芙蓉南安地

中秋八首

并序

庚寅中秋夜泊界首驛驛距八寶不數十里風浪大作即欲進舟弗能也月明如晝得詩八章時聞兒祺已至白門

容易三秋半蒼茫一水盈
有家皆酌月無地不調笙鼓
角高帆亂蒹葭野渡橫清燈聊獨對
延望若為情

明月照孤舟長淮水亂流驚鴻南北顧
羌笛古今愁夜火魚鰕市邨煙葦荻洲
登樓空有賦又負一年秋野樹宵聲動
歸林有暮鴉如何依水曲反似隔天涯
室邇人偏遠風狂浪自花開窗光熠熠
雪鷺起平沙星影透牀扉餘涼上客衣
僧鐘來遠寺釣艇度危磯風雨連宵劇
情懷此際違隨波閒泛泛簡點事全非
不敢推篷看寧甘擁被眠空寒光在水
浩淼白於天漢草金盤露星河玉井蓮
忽然成假寐疑泛斗牛邊仍是風波慣
歸期可若何明朝能不聚此景惜難多
片月閒砧杵清宵冷芰荷呼童將酒至
小飲不成歌好景即同賞猶憐在異鄉
可堪天有月還若地疑霜兒

自供瓜果客誰挹酒粿深閨應念我料未解殘妝
聞說兒曹至羈懷藉少寬十年天共遠永夜月同看即
已荒三徑何當侈二難為延清賞在尊酒且團圓

中秋前二日訪王鐵山司空蝶園風雨大作因

宿焉終宵不寐感賦二首

夜有
微月

狂飈落木雨翻盆有客偏來臥竹軒蝶羽依稀驚曉夢
雁聲斷續入霜痕話殘舊事慕爭道讀罷新詩水到門
為說夜深涼月好撥雲特地一窺園

草堂一望俯城闈岸柳周遭水數巡豈謂蓬蒿堪閉戶
即來風雨亦宜人分亭禮佛閒敲竹開館留賓或饌尊
最愛扁舟籬落泛匏尊相屬倍情親

重九日同黼臣昭緒劉玉為羅九上諸親友及

兒姪輩文昌樓登高

久客厭塵沙南來即是家湖雲肥紫蟹秋雨長黃花鬢
短萸難插風高帽易斜東籬誠可醉一水隔蒹葭

龔芝麓奉常為黼臣弟作竹溪草堂詩用少陵

重過何氏韻遠道相寄意誼良殷走筆和如其
數五首

澄湖天一色津逮擁奇書問月浮輕舫停雲補敞廬林
聲疎遠雁釣影動潛魚會有千秋約名成未敢居
小砌苔紋亂高枝綠影移迹同湖上叟歌和郢中兒吹
笛聞緱嶺扶筇怖葛陂夜來風雨至潦倒醉疎籬

為愛花開日還驚雪到時東南饒美箭簫管度新詩虛
影松傳籟寒光露拂絲柴關常不掩疑與故人期
滿院環蒼壁高寒引興長衣冠仍羽獵綦履此櫬槍夜
火魚分饌朝耕鶴代梁碧窗閒睡足車馬任皇皇
六逸人如在蔥青太古年橋危留曉月澗曲響春泉載
酒來黃浦長吟度白田三三還有徑身世總陶然

白門與薛更生話舊次其來韻二首

乍逢春色半浮沈水滿長干蕩夕陰六代煙花滄海夢
十年風雨別離心入山幸我塵機淺出世多君道力深
爭得頭顱寧幾許行行攜手到空林
金陵佳氣未全收還許登臨幾度遊風雨浹旬空對酒

故人一見可忘憂情深此際愁春去話入當年問水流
與子相看惟一醉蒼茫身世付浮漚

辛卯仲春同宗叔則大令招飲即席分得水苔

宜溜色

風物媚華滋顧瞻林壑美春澗響鳴泉清幽乃在水石
髮梳粼粼波光於焉起沈根漬丹礫荒蘚亂且理沿洄
浴朝暉谷煙散霞綺薄月蔓螢流茸茸藉茵靡絲結蛟
涎膩餘沫衣文鯉物情每相須幻化殊未已誰嗟玉階
塵而歎池火逝浩漭望溟渤迴眸俯坎止我意偕朋儕
采采溪邊芷為酌廣陵濤懷哉鷓夷子

春過金陵放舟東下攜兒子祺登弘濟寺蓋數

度燕磯鼓馬茲遊偶成四律時久雨初晴江山
如畫

燕磯每到不遑留勝日探奇梵刹幽古佛猶傳鍾阜色
唐佛原自 鍾山移來 繇花不改秣陵秋層層殿閣依巖骨歷歷山川
護石頭何事歸舟心漫切斜陽空濺水東流

春來風雨妒遊期恰好晴生此一時曲折山腰通鳥徑
峻嶒壑隙寄僧枝魚龍聽水鐘聲遠燕雀棲雲旅夢移
小憩凝眸徒悵望落霞無限暮帆遲

上下扁舟泛渺茫纔循石磴到禪房懸巖積雨殘苔潤
初日烘林老樹香正好依山藏姓字寧煩弔古說興亡
憑高不淺尊前興漫酌長江酒一觴

爛熳桃花間柳條風光兩岸足招邀怡情磯石新亭閣
燕磯新構 轉眼雲山舊市朝波影粼粼溶落日梵音細細度
重霄兒曹莫話登臨事故國依微入望遙

題美人小影

輕綃著體不生塵倦立桐陰小欠伸妾恐入宮羞見妒
故將解語讓他人

秋晚泊舟淮陰爲蘧然菴僧書二絕

欲結茅菴古渡邊皇華亭畔且蘧然樓船簫鼓年年度
不博山僧一覺眠

長淮一水任風波來往勞勞閱世多摘取黃花充佛供
月明閒聽夜漁歌

石園全集卷第五

不與山前...

...

...

...

...

...

...

...

...



